



粵西詩載卷九

奉直大夫前廣西桂林太平兩府通判汪森編輯

七言古

藩使喬公招陪學憲劉公飲灘山閣上醉歸作歌

爰記其事

張鳴鳳

喬公愛士復愛奇傍巖置酒新春時風狂欲撼山頂墮
濤怒難撐崖脚危嬌鶯當樹不敢顧大魚窺人似相忤
恰愁閣折潭更深那畏貂穿寒已屢公方離席眺前川
憲使憑闌指顧間乍喜羣峰凌暮靄忽驚片月度澄灣
此時然燭呼五白酒酣忘却風波劇留連且待須臾懽
禮數安知許多隔不見從來謝傅賢遭風嘯詠海中船

兩公襟度亦如此應恕張生醉後顛

自木龍渡浮江而下過還珠感伏波之事作還珠

歌

渡頭水深百餘尺洞門落照涵波碧人言下有支機石
定是織綃之淵客往往珠光射旁磧誤道曾傾浮海舶
梁松小兒口多螫朱勃書生訟徒劇將軍心事隨已白
帝舅列侯何赫赫悲哉巧舌銛如戟况復孤臣屢經謫
呼兒把酒酌烟波歌以還珠感今昔

棲霞篇

并序

俞安期

棲霞篇爲棲霞洞作洞在七星山半七峰參錯離列
洞亦迂曲盤旋蓋穿亘七星而行其腹中約七八里

遼遠奧冥瑋怪萬象啓堂皇支樞柱中有佛老二像
羽則鴻鵠介則龜龍毛屬則鱗鱗屬則鯉屏帳旂幢
璆石鼓鐘花卉珍異咸是膏乳所成爲桂諸巖洞之
冠張羽王志桂勝嘗首譽之以乏班張左陸盛藻發
其靈祕僅有宋季諸作爲憾余以退之汝成二王孫
導遊撫其實際加飾鄙辭組爲斯篇殆得十二雖不
類漢晉諸公弘製頗拾唐初四子之遺羽王其稍能
釋憾否耶

桂海紀殊域桂林啓神垆山水竭嘉讚巖竇侈圖經中
有羣峰列斗象上摹七曜成山形神斤鬼斧構靈窟綠
塗碧綴開仙庭靈窟仙庭非一所陰深獨有棲霞府到

如天表叩明堂入似星躔穿廣宇麒麟吞吐黃金鋪龍
鵠盤迴蒼玉柱毬場舞榭各經途旋室傾宮頻改戶改
戶經途透紫烟平原曠藪何延綿朱泥鑪冶鍊藥地球
沙阡術分區田紫葢挺芝芝九榦絳雪成丹丹九還瓊
實青柯積乳液瑤萸碧葉滋膏泉乳液膏泉結奇傀變
態繽紛難具擬誰謂雕屏百堵非競言黼帳千重是迴
頭毛寶左顧龜振鬣琴高上翔鯉東渡神僧趺寶蓮西
行道士歸仙李別有璆琳列簾縣帝庭樂器羅鈞天華
幢九華導颺駕采旂七采迎雲輶孤上金莖承露起並
垂玉筍排空連南遊萬里眇奇客秉燎窺臨每驚魄仙
偶難逢日月華王孫到共烟霞癖顧影疑過絳氣居題

名恍隸瑤臺籍詎信青山寂寞區翻藏玄圃繁華宅

海陽三異謠

丁令君民子育老幼熙熙覆華屋淳風舒徐扇邦域致
有嘉祥感羽族嗟哉白雉何太馴引雛飲啄遊西牧
丁令君理冤牘洞開圜扉放疑獄怨氣紛紜散邦國致
有嘉祥感鱗族咄哉盆鯉亦有神化作飛龍脫魚服
丁令君去害馬孰敢依馮城社下暴夫驅走出提封猛
獸驚啼散郊野咄哉猛虎遲渡河楊干寺前遭鬼打

陳望父別駕邀飲蒼梧酒紀以短歌

潯州別駕武陵客遷官歸來舟最輕鬱林之石載一片
蒼梧縹清仍數罌罌中浸以桑寄生粵中此酒古有聲

味如甘露微帶冽色似玉乳還加清碧沉一盞纔傾後
芳液流涎滿吾口多粘太淡殊厭斟萍實傷甘不思剖
蘭生百末法不存余之所嗜差可論安家二泉之新釀
魏郡易水之上尊二酒輕滑亦足比意外風味寧相似
新豐平樂傳紛紛一斗十千浪言耳

蒼梧行送沈道微參知

九疑南去蒼梧丘重華巡後歸中州牛女北來野垂盡
鬱黔南瀉江分流地連五嶺多巖竇雨暘寒燠稱殊候
九月惟看月似霜一冬不斷花如繡由來風氣稍雜夸
跣行鼻飲還蹲踈女兒晝挂金錢舞變童夜捧蘆笙吹
更有獠人便騎射輕生每獵孤城下賦稅寧來大國供

衣裳未習明王化分藩此去今屬君虎牙高建蒼梧雲
車書試使通化外萬里安事銅船軍

黃使君邀飲榴陰亭以余不得醉欲倩白將軍爲

犄角戲成短歌

昭州太守太無事荷鋤手闢衙東地藝蔬種樹復灌花
千片鮮霞錯青翠我來痛飲榴陰亭光如九枝圍夜屏
蒼梧縹清恰所好但願在地爲酒星對君瀟灑大快意
百觚千鍾不得醉驚謂酒城不易攻欲乞將軍出飛騎
君不見漢時落魄高陽生酒徒膽氣縱復橫舌下齊城
七十二誰言不及淮陰兵

題上林春色卷

關與張

上林邑勝如何上有大明萬仞之高山下有澄江一帶
之清波游人不敢陟飛鳥不得過古木參天不知數但
見白雲終日護蒼蘿思鄰八角環其後古淶鑊鄒列其
前縣治屹然當中央層巒怪壁鬱嵯峨衡陽有臥龍十
年在隆中一朝祥雲集扶搖直上太清宮上帝命爾龍
乘雲下九重簸擊滄溟十萬里復挽三湘洞庭之湖水
南踰五嶺入蒼梧遙望上林而至止上林久旱望甘霖
甘霖不至民何心雲一起今枯槁生雲再起今龍再吟
雲三起今四郊足雲四起今膏澤深轟雷聚石颺颺奔
洪崖下瀧瀉飛湍和風鼓處處庭花茂甘雨來時徑草春
春色僻饒上林苑野老行過粵水濱雨師風伯安其位

勾芒上天告上帝上帝謂龍功不細余將命爾遊天庭
坐令四海沾天惠

題上林春色卷

王一岳

獨龍駕馭扶桑曉一掬陽和噓四表海上炎州紫瘴消
上林春色增多少琪花瑤草鬪嬋娟美獸珍禽侈品藻
康衢擊壤樂陶陶鼓篋鳴絃春皞皞或從水底鋤青雲
或向星前犁七寶或橫短笛牛背吹或携卮酒花邊倒
千家似入華胥國八里如登蓬丈島憑誰剩得此春光
都道縣官殊絕好刑輕賦省法不苛寇息年豐吏不噪
五年幸有生民樂今日歡迎春夢擣吁嗟有此安樂郊
恨我當年來不早世間何處覓龔黃嶺表從今歌洞獠

玉屏此日姓名題堂蔭千年天地老慙非山斗自支頤
幸與驂騮同一阜新詩幾欲鳴盛美才乏相如殊草草

上林吏隱歌

五嶺由來炎瘴方上林之地更幽僻雨霰冥濛掃不開
四壁寒蛩聲唧唧蕭條茅屋兩三間竹樹烟村五六七
層巒疊翠盡青霄雲往雲來蔽白日參天老樹虬龍蟠
澗裏玄猿悲月夕山中野老不記年只看山花爲歲曆
婦持筐篚夫鋤犁南畝東墟各努力陌頭春色歲華新
男女行歌兩拋擲蓬頭跣足去來忙猺獞持戈當路側
我挽江流洗瘴氛拔劍指天山破裂千崖豺虎永潛消
盡掃蠻塵歸統一昔時射策謁金門鵬運九天搏兩翼

誰知塌羽落大荒鴛乘只堪充下櫪遙瞻溪表紫流霞
粵鄙微軀抱忠赤公餘閑暇碧槐亭笑領清風臥松石
有時后圃看奴鋤籬菊池蓮隨意植忽聽林間野鳥鳴
逶迤小徑蒼苔濕舉頭閩嶠白雲橫鶴鴿原頭胡寂寂
縱有蘭芽堦下生奚似彩舞堂前席我歌吏隱且奈何
長嘯一聲天地碧

和上林王邑侯吏隱歌

謝忠

州縣拆裂有分土閭閻無民非赤子張官置吏欲何爲
祇欲斯民盡安堵上林僻在粵嶺西民風古陋言侏儻
烟瘴冥濛山水惡峰巒崑崙崑崙嶺北望長安雖萬里
盡屬皇明一統裏溥天之下皆王臣林民豈是蠻夸比

田可耕兮塘可漁工商樵牧總相宜比鄰烟火亦相接
家家稻谷多贏餘邇來頗爲征輸苦况復猺蠻肆掠擄
烟村雞犬漸蕭條廬井田園間荒蕪我侯崛起閩粵中
才名冠世氣如虹一朝脫屣登雲路直欲乘風步紫宮
無何捧檄入城郭銳志爲民除殘蠹干將一試虎狼馴
霖雨一施禾黍渥百年積寇蠻瘴消八里生靈頌聲作
郎星尚擬作台星鸞刀且作牛刀握枳棘豈爲鸞鳳棲
龔黃須入循良軸高堂戲彩時或違異日褒封榮亦足
底事年來式作歌重歌吏隱將爲何百里豈能伸駿足
應爲餘閒笑傲多顧余豈是烟霞侶說來吏隱猶堪擬
庭槐口永自交花簷鵲春叢空對語青衿逐月不往還

課畫何嘗污片紙旣無案牘一勞神更何豕亥相咨啓
曉起偏饒抱膝吟午過何妨未梳洗有時登眺南薰樓
有時濯足澄江滸有時清夢羲皇上有時燕笑松陰底
尸素林庠四載齊笑余吏隱真何比自慚無計附冥鴻
天涯閑散成龍鍾幾欲掛冠向神武誰知未擬開筠籠
何時獲展飛騰翅兩意憧憧正猶豫山城秋宇雨濛濛
倏荷中涓持玉至開緘誦讀海天空敬綴俚詞賡佳句
傅氏節婦歌
雲上行
潘郎妻傅姓女潘郎事遠游空房誰爲主傅爲婦潘爲
郎客途郎已死空負骨還鄉當時家貧且無嗣白骨蕭
蕭胡足恃抱骨慟絕幾復甦終求縊死從其夫從容就

縊真難事豈爲憤激而捐軀乃知慟欲絕生死已先決
不忍稱未亡惟期葬同穴天上芳魂翼比飛地下遺骸
玉聯潔哀怨無勞枝上鶻知心儘有墳頭月月照鶻啼
年復年萬古綱常日在天世間謾說好男子屈指幾如
此婦賢婦節臣忠事一體秉彝好德心同然君不見挽
歌哀步昔連篇至今青史盛流傳又不見邇來國家重
名節史臣每采陳金闕不徒錫奠與構祠宅里表揚崇
綽楔吁嗟乎山可頽水可竭此婦身可亡此婦之名不
可滅

遊南山

譚耀

南山之高高百丈白雲俯兮飛鳥仰何年造物闢穹窿

別有世界如壺中鐘乳千秋懸絕壁古磬萬斤掛殘櫟
流雲石佛半天開雙鯉三清相對立孔道縈紆晝宵冥
不妨秉燭折腰行行過翠微眺阡陌回首山城烟火隔
摳衣服攝碧凌層大風爲洗凡衿塵客子追隨苦未得
傳經石蹬仍留羣須臾轉入宜仙府奚僮擲石類搗鼓
鼓韻鐘聲相應長笙簧何事奏當場客來漫游知者少
塵心飛盡蘆蘆表踉蹌日哺駭猿夔浩唱一聲山鬼棲
開樽對客無爾汝欲倩青萍掛夕暉

全州道傍官松歌

何喬遠

全州官路何逶迤十里五里松參差間桐攢梓相撐薄
穿雲參天互蔽虧冰霜一道過驕陽笙簧兩徑吹流颺

鱗甲老爲赤鐵色，鳶蘿挂作青蚨枝。共言官樹不敢伐，或有剝蝕無枯皮。昔余京師宦六年，心愛此樹常攀攀。報國寺前葆蓋團，顯靈宮裏虬龍顛。天壽山中最蓼爽，原廟闕密無繇前。誰如此樹看不絕，行人客子心俱便。借問此松何年有，國初種者章太守。古人爲政重精詳，津梁塗巷皆紀綱。蔽芾遺思今則亡，斤斧且得非時傷。嗚呼斤斧非時傷，我行大江以南不見梗楠與豫章。

瞻鶴洞歌

有序

宗大王孫所居洞，故名仙鶴。以其先侯之號，易爲瞻鶴。觴我其中，命予歌之。

桂林諸山多幽奇，城內已足歌採芝。風洞華景饒雲谷，

清泉白石何離離。顧此夸顯人，共得東家歌管西家嬉。宗大君侯居城北，平生文雅甘橐落。一吟一嘯在清林，前山後山遶茅屋。忽從座客見我詩，齒頰若不忘我爲。延我屋角一古洞，觴我恣我隨所宜。此洞空心一石喉，玲瓏窳窳通上頭。梯空穿暝忽高出，懸欄虛牖如雲浮。告我洞名故仙鶴，昔人畫形於此琢。吾父好之以自况，我用今名易茲壑。層穹厚地一生悲，急樹號風豈在目。嗚呼鶴乎鶴乎，何處歸千古。獨有丁令威君侯，日夜想音徽。載魄通精總不違，雖無城郭看是非。夢裏飛鳴或有玄裳與縞衣。

勾漏歌

蘇濬

息馬山之曲春草萋以綠白雲何意出層顛千峰萬峰
自相屬數聲雞犬空中聞百丈蛟螭巖際宿山前老叟
向余歌嘲風弄月誰羈束欲訪山翁何處尋笑指松間
一茆屋當年葛令安在哉片片烟霞出空谷幽枝堪掛
竹皮冠清溪不礙荷芰服珠璣芝田儼相向鳳管龍笙
斷復續莫問丹砂事有無一醉山中萬事足

王將軍出鎮粵西歌

吳道南

漢室標銅柱宋庭紀武襄君今出鎮地卽此舊封疆方
今四表風塵靜體壯還須察脉病域中露布暫紆馳海
上風帆難預定念軫邊陲思鼓鼙特命將軍鎮粵西北
門鎖鑰雖云急南國干城未可稽美材南金并竹箭文

武元猷茲復見雙虬斗氣貫長虹三矢天山飛掣電矧
乃詩書卻縠儔何事周南久滯留先幾炳炳占祥怪良
將拳拳副眷求羊城數載新營壘八桂旌旗仍復爾綈
袍胡床曹國華緩帶輕裘羊叔子謾訝琉球日本依折
衝樽俎望攸歸中國不虞揚海汛南人猶自懾天威竚
看託重燕然塞勒石標名勲可再回朝燕喜賜彤弓維
時孝友侯誰在

朗吟亭

管大勳

北風搖蕩江雲飛與客登山叩石扉寒鴉枯木少人迹
青蛇寶劍長八尺朝從北海過洞庭暮掃蒼烟吹石壁
吸盡三江無一滴坐看二儀自闔闕世人滔滔名利間

不如遺落歸深山山中自有仙家樂渴時甘露飢胡麻
興來醉臥松根石寤覺長天秋一碧吁嗟乎呂仙呂仙
何處尋環珮飄飄只朗吟

探奇行送爾律出牧宜州

陸鳴和

春風慨然忽攬轡天下澄清行素志萬里驅馳歷百蠻
置身險峻何傾陂人嫌君道直如弦故把羊腸試一還
豈知君心淡若水百折不回常清泚會看風義振遐荒
敦修禮樂詩書香雍雍鑄就清和境寧復知身在異鄉
異鄉風土信何如由來西粵號崎嶇危峰拔地藏巖洞
自古探奇喜下車奇生寓內何可旣火齊木難未足貴
漫誇威鳳與祥麟琪樹瓊花亦空蔚惟茲翠嶺嶮巖之

奇形偏愜幽玄磊落之勝氣况多貝闕更瑤房丹竈芝
田仙路長冥搜應得紫青味呼吸將通玄圃堂君不見
昔日南海鮑太守往來羅浮雙燕偶又不見東方曼倩
生遨遊紫海暨蓬瀛雲嶺霞巔蕩智日哀羅光怪譜金
牘瓌麗齊驅馬子長柳家記述猶膾腹探奇探奇意飛
動鶴背翩翩真足控京轂風塵他自饒烟巒沆瀣吾堪
弄弄罷還來傍紫宸翻然一笑宜州夢

石梁豹變歌

張自諤

香林書院甫成宜山孫明府更名石梁而適有文豹
來院傍爲莊備戎格之以獻敬賦
石梁主人龍水客石梁書院龍谿脉一脉斯文千古傳

主人直逼蘇黃格黃從蘇出遠來宜天遣涪翁作世師
榮辱都遺談性命執經滿戶墨盈池妙絕此翁提後覺
太守丹霞承此學山谷祠崇廟貌新藻句迎神雲漢倬
奇哉霞翁矯如龍緒餘及物真治躬神游八極不可從
至今徒令想流風龍谿故業誰還宗五百年來待岳公
地因瑞石傍雲峰講堂寢室構于中石梁名院孫明府
識仁名堂石梁主識仁堂上識主人石梁美號堪千古
經營更有守戎莊軍令公嚴計日量蕭尹思恩遙助力
頓教草昧起明光三公同事若天使石梁公得託終始
此日公來主石梁喜動諸生隨玉趾仁風當坐共秋清
時雨更番化欲傾主人德愛真君子獻豹何期應此盟

大夫華國文原蔚飛將登壇看足貴程度還如廉吏操
南山霧隱余全未休誇勇剽勢猶螭却與豐狐患有皮
節著羔裘宜用飾一斑今向管中窺石梁歌歌豹變儼
然溫厲是主人齊魯至道歸書院

望蒼梧

區大相

白雲游兮蒼梧山連卷兮路崎嶇日黯黯兮晝多霧巘
嶒嶒兮鬼嘯怒穆蘿蒼鬱兮塞往路我欲從之修且阻
鷓鴣兮空山帝子去兮不還道遠兮何極不能隨之兮
淚霑臆涉湘臯兮綠潭悲洞庭兮芳夕疎篁兮斑斑山
含怨兮水含憶步遠岡兮不見蹇夸猶兮難卽望蒼梧
兮白雲隔千里兮思君撫瑤瑟兮寄幽怨採杜蘅兮愁

氛氲

望八桂

桂樹生兮山南沐玄雲兮蔭芳潭擢修莖兮幽靄布芳
葉兮夕嵐發華滋兮秋風翔羣羽兮鷓鴻旣拔萃兮高
嶺復灌生兮玄冬揚芬兮素節含貞兮嘉月有美人兮
傷離擊巖桂兮爲期信懷芳兮自保又久要兮申之去
不來兮來不采芳寂寂兮欲誰待嘉樹茂兮巖間桂父
淹留兮往還登樓兮長詠望八樹兮杳難攀

太白樓讀王恒叔詩慨然有作因憶天台舊游劉
忠父陳大期皆化爲異物時恒叔以司諫外補粵

西觀察

何白

任城落照平蕪夕起酌椒漿呼李白朱薨縹瓦照城闔
鳥外冥冥遠天碧荒碑斷碣臥林林剝落龜趺黯無色
孤光忽迸夕郎詩差似寒山一片石憶昔尋君過赤城
烟濤鼓柁窺東瀛天低海樹殘霞明瀑流喧厓河漢傾
華頂秀出擢紫清海日欲上天雞鳴手翳紫芝笑披拂
璠臺石室相縈鬱龍嘘宵壑石潭寒虎嘯空林山月出
酒酣起舞歌嗚嗚激賞繞牀敲唾壺劇語蟬聯不知曙
門前楊柳聞嗚烏我騎白鹿還江渚君向金門謁明主
諤諤翻令世不容一官遠渡鵝翎浦袖裏空留三載書
雲中難寄西飛羽陳生劉生倏爲鬼撫事悲歌淚如雨
我聞八桂鄰夸窟勁弩長弓好馳突撫綏須用出羣材

繡斧煩君開百粵伏波銅柱炯未磨洗兵應惜蠻王血
念茲夙昔同心期側身萬里令人悲清溪重來亦惆悵
長江怪底名相思過眼勛名亦如此遲迴莫待車生耳
早晚相將雙闕間采真共鍊金鵝蘂

玉主行

郭正域

閩人林某豪俠士惑志于京倡劉氏傾囊金納之資
斧頓盡逾時以貧故勸劉且歸劉哭誓死不再嫁林
別去商于嶺西劉死京邸林聞之匍匐歸痛哭刻玉
爲主題曰劉氏之魂後繫以斷腸曲一首語甚淒楚
朝夕置懷袖每以示諸交游後復挾數十金之嶺西
過大江舟師故大盜殺之沉其屍適閩人某爲郡司

理故習林事一夜夢婦人來訴冤詰旦斥羣吏索盜
獲玉主司理大驚求林屍江中如生遂盡捕羣盜百
餘家江上以寧此玉主之所以報林也異哉予友葉
進卿傳其事予爲歌之

燕城明月照倡家雙雙好鳥報俠邪劉姬十五顏如玉
羞殺燕城萬樹花門外紫駟驕叱撥院中綠柳鬪昏鴉
畫就蛾眉同遠岫傅將輕粉賽明霞裊裊金蓮籠繡襪
纖纖玉手撥琵琶歌喉宛轉風前度人道千金纔一顧
綵毬無數任頻拋費盡纏頭不得住林郎儻七閩客
倒篋傾囊憑一擲松月蕭疎擬性情玉山磊落爲標格
明珠滿斛買名姝奚論黃金與白璧三星耿耿夜迢迢

結就同心兩脉脉，熱煖金爐透錦衾。掩上瓊牕，寒襲積
掛却流蘇露。合歡惱殺鳴雞，驚寢席，願比文鴛兩翼紅。
不念青蚨雙手白。年年暮暮，復朝朝費盡神錢，不可招
玉壺一破，難儲水翠鳥高飛。肯顧巢長，歎燈前一杯酒
莫以紅顏持敝帚。山前好問買臣妻，風流肯落楊枝後。
劉姬雙淚如紅雨。誓死如歸真，自許寧爲玉碎響璘珣。
肯效萍飄無定所，歡聞大笑更何求。感卿義重心良苦，
大舸明朝泛五湖。燕山楚水又蒼梧，千金手在散還聚。
一寸心石去不孤，擔簦一去秋閨冷。明河夜夜拖金井，
轆轤一轉一含愁。銀瓶落下垂空綆，臂間破碎玉連環。
房中焚却相思枕，落花不顧條上心。孤鸞空死鏡中影，

渺渺芳魂逐玉郎。客邸聞之真斷腸。倉忙星月關山遠，
黯淡衣裳粉黛香。歸來痛哭茹荼毒，縱有千金難再續。
重泉何以寄悲愁，覓得崑山一片玉。前寫芳卿小字名，
復題腸斷悲哀曲。出門繫在綠綺裳，入門藏在青羅襖。
相將南北更西東，行行苦雨又淒風。天涯共踏王孫草，
一似銜蘆隨斷鴻。買舟遠向粵西路，日沉瘴海青天暮。
鷓鴣啼罷鬼車來，四望楓林起黃霧。舟師原是綠林豪，
叱咤腰間出寶刀。血沉弘碧半江水，魂作胥山萬里濤。
蒼梧使者七閩才，兒戲曾同竹馬來。郡齋夜半醒不寐，
恍惚如聞窈窕哀。蹒跚搖曳不成步，唧唧切切如泣訴。
朦朧玉貌未分明，似語無聲總不平。詰朝驚起問羣吏，

天道神明似有情樓頭鼓響傳行馬伐鼓鳴鉦搜四野
怕有赤丸暴客多能無白晝殺人者黃昏鬼哭大江頭
含冤寧是婦人也邏卒倉忙鎖賊奴魍魎頭梟眼狠而粗
階下片言情自吐不俟囊頭五木呼賊奴住在山之谷
檢出崑山一片玉前寫芳卿小字名後題腸斷悲愁曲
使君慣見眼模糊咄嗟此物何爲乎夙昔少年同里閭
鍾情曾有酒家胡試向江頭問水濱鼉室蛟宮出故人
水底炎天經半月頭顱面貌儼平生玉山磊落依然在
松月蕭疎尚有真使君痛哭停丹筆覆盆之下青天出
縛盡賊奴幾百家霹靂虛空驚白日從此江頭犬不聞
妖氛散盡無愁雲分明曉夢冤魂出死別吞聲上帝聞

昔日玉顏今玉主今日報仇昔報恩

桂嶺守歲效李長吉體

王士性

街鼓逢逢催曉急家家椒柏春風集傾盤剪勝百事新
昨夜神荼燼中泣朝行紫海暮歸疾母道經年兒半日
兒女催人携老至百年轉盼須臾事蒼梧夢斷紫筠斑
石墮湘流去不還無計聖賢能守此年年草色自江關
坐來兼憶麻姑別東海飛塵白如雪

謁柳柳州祠墓

天寶貞元人已死千年大業竟誰是手提大冶鑄乾坤
後來共說河東氏並轡中原有幾人愈也角立河之濱
百川却障狂瀾折風雨延津會有神解道河清苦難俟

瞥驚白日風塵起去國投荒十二年驅鱷開雲八千里
魅魍蛟螭作比鄰強開閭胥就陽春耐可呼天作知己
詎知天意難具論刻物肖形神理在尺管疇令握真宰
爾曹自取造化忌天死炎荒託蓬壘侯死較先韓較後
羅池之碑及韓手教氏春秋鬼不饑桐鄉丘隴人應守
潯水南流卽舊津黃蕉丹荔伏猶新手披蔓草荒祠下
余亦東西落魄人

弔劉參軍黃墓

錙參軍獨鶚啾啾百鳥羣長鋏倚天氣吐雲巫咸不下
霄漢遠淚斷杞國人無聞欲抉霾曠上天門虎豹狺狺
坐九闈玉女投壺笑方劇衆星爭月光猶繁且招龍比

遊地下萬里投荒奄墮馬湘流東去鵬南來長沙弔原
君泣賈生慚借劔阻尚方死願裹屍棄中野雄虺封狐
任九頭魂招不來粵山赭錙參軍青山瘴癘多風雨化
碧啼鵲一坏土土偶何知便是君請看生氣摩靈氛

栖霞洞

伏波山前桂樹林伏波山下灘江深八桂掃天不見影
七星墮地成瑤岑倒植雲根覆地肺瞥然有洞窺江心
上列星樞懸法象下剗石脉倚崱嶽束炬照天行白日
噫氣淅瀝吹衣襟龍門千尺玄鯉躍天關三疊頽霞沉
寒巖六月不知暑處處鍾乳如懸針湘靈合掌布袋笑
獅象駱駝爭獻琛金山瓊海勢蕩瀟萬古石髓堆至今

更有怪石亂相蹲禪床不動禪房陰巖縫突出巨靈手
杖底似聞鐘梵音幽壑風生虎豹踞寒潭水冽蛟龍吟
飛走萬靈無不有首垂鼯鼠緣蝌蚪蒼蘿高掛日月昏
顛崖中斷風雷吼乍見明星出海樹驚起栖鶻號鬼母
何年六甲操神符手弄雙蛇開戶牖豈是媧皇煉石處
石裂天傾逗江口區區三十六洞天索通道書藏二酉
誰爲遺此落人間夜夜流霞光射斗

玉主行

徐勣

林丙卿福清人生平倜儻好遊俠邪遇當意揮千金
不顧劉姬鳳臺者年十五有聲教坊貴游爭慕之姬
不與狎一見丙卿驩甚託以終身丙卿破數百金納

爲妾久之丙卿游吳越間道聞姬死慟哭幾絕疾馳
抵燕日夜哀痛刻玉爲主提携不去左右爲賦長短
句題玉上曰入時倒郎懷出時對郎面隨郎南北復
東西芳草天涯堪遶遍勝寫丹青圖勝妝水月殿玉
魄與香魂都在此一片願作巫山枕畔雲願作盧家
梁上燕莫似生前輕別離教人看作班妃扇歲丁酉
丙卿去燕復游西粵僦舟東下爲舟人陳亞三所殺
沉其屍於江掠其貲以去蒼梧林司李丙卿友也半
夜忽見婦人稱冤狀因呼邏卒嚴捕禦人者卒搜亞
三橐得玉主司理大驚窮索餘黨伏辜求得屍顏面
如生肌肉不損觀者異之葉太史傳其事余爲作玉

主行

燕山幻出蛾眉質翠羽鳴璫金屈膝就中百萬倚門倡
若箇輕盈稱第一傾城少女長劉家十五妖嬈未破瓜
到處名姬羞粉黛一時佳冶避鉛華櫻唇半啓飄金縷
百轉嬌喉鶯乍乳間拂朱絃奏鳳凰時拋紅豆調鸚鵡
對客閒參湖上禪桃花重製蜀中箋芙蓉學綉相思枕
榆莢羞看買笑錢五陵俠客紛無數爭進千金求一顧
妾貌雖同解語花妾心已作沾泥絮風流閩海說林郎
年少曾登游冶塲黃金盡買纏頭錦贏得聲名遍教坊
明珠欲換娉婷女金谷園中貯歌舞滿眼無人荷目成
劉姬一見心相許結束驩然出俠邪九枝銀燭七香車

鴛鴦忽比雙飛翼菡萏俄開並蒂花珊瑚寶玦流蘇帳
蜀錦紫絲縈步幃占斷春風歲復年秦箏趙瑟搗相傍
可憐行樂在須臾夫婿長游入五湖膏沐懶施雲鬢亂
空床獨守夜燈孤春花秋月無情去誤妾佳期等閒度
婉意柔情孰與伸千愁萬恨憑誰訴明河耿耿路迢迢
望絕音書歎寂寥紅頰每於愁處損朱顏多向暗中凋
思君不見令人老柳葉雙眉畫慵掃香魂渺渺落黃泉
玉骨纍纍瘞芳草人傳消息五湖西夫婿傷情掩面啼
碧沼游魚乖比目雕梁飛燕失雙棲哀絃聲斷絲難續
死別生離成一哭沉思無計表深情售得連城舊明玉
磨礪朗潤復輝光賦得悲哀句短長中間自鏤芳卿字

未下金刀先斷腸錦囊裝貯殷勤記鎮日重重牢繫臂
東西南北但身隨旦夕何曾暫相離携向蒼梧萬里游
逢人開取淚先流鷓鴣叫月悲長夜蛤蚧鳴風感素秋
江頭忽遇探丸客化作杜鵑歸不得黃昏野魅泣精靈
暮雨遊燐啼怨魄玉主漂零何處歸芳魂長繞粵江飛
夜臺飲恨重相見朽骨含冤事已非蒼梧司理眠官閣
忽覩仙姬來綽約含怨含顰若有詞半羞半怯如相託
索索陰風毛骨寒分明環珮韻珊珊漸聽嗚咽聲初遠
起視星河漏欲殘心知非幻仍非夢定有幽魂抱深痛
綵線縫裾獲赭衣驟看玉主神驚動由來此物屬林郎
刻玉題詩爲悼亡珍藏久識依懷袖流落何因在異鄉

傷心細向公庭鞠舊鬼呼哀新鬼哭始覺孤身入虎牙
更悲俠骨填魚腹詎信蛟龍不忍吞隨波逐浪幾朝昏
千秋重閱曹吁事九辨難招屈子魂吁嗟此事何奇絕
名姓從茲播西粵真迴白日照重泉果有嚴霜飛六月
片玉堪將恩遇酬死生肝胆在紅樓方知白璧能伸恨
不獨青萍解報讎

答贈粵西大將軍王宛委見懷之作宛委書來有
懷將母思吏隱白門故云
范鳳翼

我所相思在西粵萬里馳書歲三發桂林荔水隔蠻烟
離尤空付天邊月各天相照肝膽真子孝臣忠交一身
臣義安逃天地外何得如我江湖人頃復貽我琅玕字

啓函盡說心頭事銅柱功名若等閒三山二水思仙吏
雖復名成燕石勲老臣何忍負吾君正提闔外熊羆旅
莫問山中猿鶴羣

遊桂林諸山

吳鐘巒

我昔遊黃山其奇不可說中無塊土純以石稱絕烟霞
猶秘丘壑間未若粵西諸峰巖洞奇奇怪怪忽從平地
設洪荒開闢何許久千載風流柳州柳我亦來茲八桂
堂蕭條異代夫豈偶跋涉山崖與水濱朝朝暮暮思湘
雲果然一見快知己各各突兀崛強不肯逶迤卑伏下
與培壘羣從來山水多畫圖十日五日常不孤至此如
旗如鼓如屏如扇如簪如筆羅列几案丹青無長松短

松鬱盈望近郊石流可塞裳桃李正開沐霖雨土膏已
發農漸忙四顧喜得未曾有咄咄逼人駭走却還再
拜問山靈山靈唯唯復否否世間諸見目爲障遂使平
奇見兩相見奇見慣奇不奇奇中見平亦奇狀何如仙
人空中有樓閣往來乘雲駕雲鶴下視奇平不足論手
攬星辰坐碧落五丁仰見欲顛仆移山西來繞榕樹紛
紛亂墜壓奔流衝擊噴薄灘聲怒洞門深黝若室屋石
乳殮之可辟穀壯哉雄視灘水濱風波何必嗟沉淪世
眼眈眈注金玉解得看山有幾人芙蓉朶朶錦片片千
回萬回無數轉峩峩獨秀鎮王宮蒼翠丹黃撲顏面七
星疊彩奇未已愈出愈奇難肖擬疑是神游非想天憑

虛可勺銀漢水伏波試劔呼俊傑延之讀書此怡悅昔
人見賞杜陵翁地遠繁繞祇藏拙五嶽欲周今老矣一
官半局非吾意對此嶙峋差散懷飛揚叫笑偏生致山
靈何不將石鞭盡驅百蠻就擒捕使我覩所未覩經未
經山靈謂吳生六合之內六合之外奇怪無窮無盡爾
安知

張義姑辭

陳繼儒

有雛有雛六歲而孤無怙無恃如委道塗張氏垂絕可
奈何可奈何義哉姑處子不嫁之死靡他不願爲鳳凰
翱翔井邊梧不願爲鴛鴦遊戲水中蒲但願雛長成身
作白頭烏青春逝清夜徂抱兄子淚血枯爾寒我襦爾

饑我舖授爾句讀愛爾髮膚娶婦生兒美且都孤兒活
不知無母室女老不知有夫險哉一縷千鈞扶程嬰李
善何難乎吁噓兮巾幗男子粉黛妖狐汝獨不聞桂林
張義姑

經略臺懷古

區龍禎

越南西去古銅開牂牁之水何年至別有繡江遶故臺
臺自開元間樹幟南屏蠹蠹都嶠君大容虎踞並超羣
劃成千古英雄地往事升沉悵夕曛駱駝壩龍巷軍九
派滙師武臣當年節鉞知誰在五筦芳名今尚聞間有
漫叟爲元氏輕裘緩帶羊叔子文章已擅盛唐名南海
泱泱分賜履忽憶蓮湖面面亭風流易盡留芳芷行塵

不隔荔枝紅楊灣尚在楊妃死地靈人傑總一時銷越
歇晉千江裏由來荒裔亦無常一枰碁局等同戲倏忽
游移數百秋山城遼絕如斗寄人風遐想京洛遺炙踝
文身差可異變閩化蜀總何人海濱鄒魯寧殊地曾不
見濯纓石釣魚臺千年人去鶴歸來南山壁立還相對
江流不盡迴復洄助名幾度成消長徙倚城頭玉漏催

濯纓石

江邊一片石何人向濯纓只見江邊石不見石上亭怪
哉此石貞如沉不在滄浪在烟瘴太華蓮岳未許扳羅
浮日觀差同尚豈謂生來自他山不用爲錯寧爲碣纒
纓紆綬等閒看誰纓誰足宜無妄臣門縱如市臣心終
此石亦中流寄語沙棠維楫者放歌石上一虛舟

棲霞洞

曾日章

棲霞七崗相鉤環回視八桂爲名山日華月華不可見
高風萬古應難攀邃聲吹徹空濛裏仙酒何人識甘旨
偶遇樵者得佳名碧空之樂真無已秋香桂子風蕭颺
我陪內侍成遨遊題詩洞口紀歲月應與鸞鶴千年留

題勾漏洞

尹崇珂

我生本有山水趣妄想忽落利名間簪紳縛人等羈繼
歲晚不覺兩鬢斑牢落離家知幾載問我蹭蹬何當還
驅車道出勾漏洞尋真訪隱聊開顏丹竈刀圭豈易得

止恐石髓成堅頑雲霞抹空覆聖境鐘磬發響鳴深山
仙蹤流傳在指顧捫蘿上石誰能攀人求丹砂得白石
仙分應無那得餐

門人崇善鄧生林校

粵西詩載卷九

粵西詩載卷十

奉直大夫前廣西桂林太平兩府通判汪森編輯

五言律

過蠻洞

唐宋之問

越嶺千重合蠻谿十里斜竹迷樵子徑萍匝釣人家林
暗交楓葉園香覆橘花誰憐在荒外孤賞足雲霞

自湘水南行

張九齡

落日催行舫逶遲洲渚間誰云有拘役乘此更休閑暝
色生前浦清暉發近山中流澹容與唯愛鳥飛還

送岳州李十從軍桂州

張說

送客之江上其人美且才風波萬里濶故舊十年來劔

拔蛟隨斷弓張鳥自摧楊橋書落落驛馬定先迴

送邢桂州

王維

鏡吹喧京口風波下洞庭赭圻將赤岸擊汰復揚舲月
落江湖白潮來天地青明珠歸合浦應逐使臣星

題梧州陳司馬山齋

孟浩然

南國無霜霰連年對物華青林暗換葉紅蘂欲開花春
去無山鳥秋來見海槎流芳雖可悅會自泣長沙

寄楊五桂州譚

杜甫

五嶺皆炎熱宜人獨桂林梅花萬里外雪片一冬深聞
此寬相憶爲邦復好音江邊送孫楚遠附白頭吟

送裴二十七端公使嶺南

劉長卿

蒼梧萬里路空見白雲來遠國知何在憐君去未回桂
林無落葉梅嶺自花開陸賈千年後誰看朝漢臺

送獨孤判官赴嶺南

伏波初樹羽待爾靜川鱗嶺海看飛鳥天涯問遠人蒼
梧雲裏夕青草嶂中春遙想文身國迎舟拜使臣

送李判官赴桂林幕

錢起

欲知儒道貴逢掖見諸侯且感千金諾寧辭萬里游鴈
飛侵瘴遠桂水出雲流坐惜離居晚相思綠蕙秋

入桂林臘夜

戎昱

坐到三更盡歸仍萬里賒雪深偏傍竹寒夢不離家曉
角分殘漏孤燈落碎花三年隨驃騎辛苦向天涯

桂州歲暮

歲暮天涯客寒窓欲曉時君恩空自感鄉思夢先知重
誼人愁別驚栖鵲戀枝不堪樓上角南向海風吹

宿桂州江亭呈康端公

獨向東亭坐三更待月開螢光入竹去水影過江來露
滴千家靜年流一葉催龍鍾萬里客正合故人哀

桂州西山登高上陸大夫

高登西山上高處更堪愁野菊他鄉酒蘆花滿眼秋風
烟連象郡兄弟客荊州早晚朝天去親隨定遠侯

桂城早秋

遠客驚秋早江天夜露新滿庭惟有月空館更何人卜

命知身賤傷時舞劔頻猿鳴曾下淚可是爲憂貧

再赴桂州先寄李大夫

玷玉甘長棄朱門喜再遊過因讒後重恩合死前酬養
驥須憐瘦栽松莫厭秋今朝兩行淚一半血和流

贈宜陽張使君

暫作宜陽客深知太守賢政移千里俗人戴兩重天舊
郭多新室閑坡盡闢田倘令黃霸在今日恥同年

送李審之桂州謁中丞叔

戴叔倫

知音不可遇才子向天涯遠水下山急孤舟上路賒亂
雲收暮雨雜樹落秋花到日應文會風流勝阮家

過柳州

地盡江南戍山分桂北林火雲三月合石路九疑深暗
谷隨風過危橋共鳥尋羈魂已愁絕不復待猿吟

種柳戲題

柳宗元

柳州柳刺史種柳柳江邊談笑爲故事推移成昔年垂
陰當覆地聳幹會參天好作思人樹慚無惠化傳

酬徐二中丞普寧郡內池館卽事見寄

鵷鴻念舊行虛館對芳塘落日明朱檻繁花照羽觴泉
歸滄海近樹入楚山長榮賤俱爲累相期在故鄉

送桂州嚴大夫

韓愈

蒼蒼森八桂茲地在湘南江作青羅帶山如碧玉簪戶
多輪翠羽家自種黃柑遠勝登仙去飛鸞不假驂

送人之臨桂

張籍

旌旆過湘潭幽奇得遍探莎城百粵北苻路九疑南有
地多生桂無時不養蠶聽歌難辨曲風俗自相諳

送南客

行路兩脩脩青山盡海頭天涯人去遠嶺北水空流夜
市連銅柱巢居屬象州來時舊相識誰向日南遊

送嚴大夫赴桂州

白居易

地壓坤方重官兼憲府雄桂林無瘴氣栢署有清風山
水衙門外旌旗艘艦中大夫應絕席詩酒與誰同

走筆贈許玖赴桂州命

張祜

桂林真重德蓮幕藉殊才直氣自消瘴遠心無暫灰劔

稜叢石險箭激亂流迴莫說雁不到長江魚盡來

遊東觀

張固

巖岫碧孱顏靈踪若可攀樓臺烟靄外松竹翠微間玉液寒深洞秋光秀遠山憑君指歸路何處是人寰

南中

王建

天南多鳥聲州縣半蕪城野市依蠻姓山村逐水名瘴烟沙上起燐火雨中生獨有求珠客年年入海行

桂嶺

嶺頭分界堠一半屬湘潭水驛門旗出山蠻洞主參辟邪犀角重解酒荔支甘莫道中華遠安南更有南

桂林路中作

李商隱

地暖無秋色江晴有暮暉空餘蟬嘒嘒猶向客依依村小犬相護沙平僧獨歸欲成西北望又見鷓鴣飛

桂林卽事

城窄山將壓江寬地共浮西南通絕域東北有高樓神護青楓岸龍移白石湫殊鄉近河禱簫鼓不曾休

昭州

桂水春猶早昭州日正西虎當官路鬪猿上驛樓啼繩爛金沙井松乾乳峒梯鄉音殊可駭仍有醉如泥

哭劉司戶蕢

路有論冤謫言皆在中興空聞遷賈誼不待相孫弘江濶唯迴首天高但撫膺去年相送地春雪滿黃陵

又二首

離居星歲易失望死生分酒甕凝餘桂書籤冷舊芸江
風吹鴈急山木帶蟬曛一叫千迴首天高不為聞
有美扶皇運無誰薦直言已為秦逐客復作楚冤魂溢
浦應分派荆江有會源併將添恨淚一灑問乾坤

異俗二首

自注時從事嶺南

鬼瘧朝朝避春寒夜夜添未驚雷破柱不報水齊蒼虎
箭侵膚毒魚鈎刺骨銛鳥言成謀詐多是恨形瘡
戶盡懸秦網家多事越巫未曾容獺祭只是縱猪都點
對連鰲餌搜求縛虎符賈生兼事鬼不信有洪爐

送戴端州赴容州

陳羽

分命諸侯重歲蕤繡服香八蠻治險阻千騎踏繁霜山
斷旌旗出天清劔珮光還將小戴禮遠出化南方

蠻家

項斯

領得賣珠錢還歸銅柱邊看兒調小象打鼓試新船醉
後眠神樹耕時語瘴烟不逢寒便老相問莫知年

蒼梧雲氣

何年畫作愁漠漠便難收數點山能遠水不流濕
連湘竹暮濃蓋舜墳秋亦有思歸客看來盡白頭

海南送韋七使君赴象州

陳陶

一鶚韋公子新恩領郡符島夸通荔浦龍節過蒼梧地
里金城近天涯玉樹孤聖朝朱紱貴從此展雄圖

桂州經佳人故居

李羣玉

種樹人何在，攀枝空歎嗟。
人無重見日，樹有每年花。
舊院雀聲暮，半庭春影斜。
東風不知恨，滿地落餘霞。

送曹郎中南歸時南中用軍

李洞

桂水淨和天，南歸似謫仙。
繫條輕象笏，買布接蠻船。
海氣蒸輦軟，江風激箭偏。
罷郎吟亂裏，帝遠豈知賢。

送容州唐中丞赴鎮

張泌

交趾同星座，龍泉佩斗文。
燒香翠羽帳，看舞鬱金裙。
鷓首衝瀧浪，犀渠拂嶺雲。
莫教銅柱北，說馬將軍。

寄湘中鄭明府

黃滔

縣與白雲連，滄洲况縣前。
巖僧同夜坐，江月看秋圓。
琴

拂莎庭石茶擔乳，洞泉莫耽雲水興。
疲俗待君痊。

次梧州却寄永州使君

周朴

隨風身不定，今夜在蒼梧。
客淚有時有，猿聲無處無。
潮添瘴海濶，烟拂粵山孤。
却憶零陵住，吟詩半玉壺。

全州冬月陪太守遊池

僧無可

殘臘雪紛紛，林間起送君。
苦吟行迥野，投跡向寒雲。
絕頂晴多去，幽泉凍不聞。
唯應草堂寺，高枕脫人羣。

磐石

宋柳開

古寺聳山椒，公堂去不遙。
尋僧忘俗慮，盤道出塵囂。
疎箔捲烟霧，明眸望沈瀲。
漁翁江上立，指我在雲霄。
遞中得先之，兄書取邕欽。
宜柳歸約十二月到此。

年節已近未聞來朝寄奉
李師中

我在灘江上君行瘴海濤因勞南去夢暫望北歸心別
後年華改新來雨露深憑欄望書信一字抵千金
遠宦良多感新來更可悲春隨斗柄動人自海邊歸僕
馬疲勞甚郊原雨水時經旬不得信凭檻又吟詩

題太空子隱居

劉仲遠自號太空子

可道非常道真空本不空荒郊自生草閑地又栽松無
欲更何慮有爲終必窮風雲上天去老子信猶龍

昭潭十愛

梅 摯

我愛昭州水湘灘共一源本無汗泥滓去有棹歌誼沃
野藤溪道浮琛玉海門有時新雨漲多半是君恩

我愛昭州士平居富塾庠興賢尊漢詔論秀美周鄉藝
苑蒲開堞書堂縹結囊蟾宮前後進一一手間香

我愛昭州觀裁基壓大溪一樓雲駐隱雙表鶴歸迷金
剡先朝語鸞驚舊使題皇恩新雨露祈福爲蒸黎

我愛昭州寺東西占景開門臨九峰列僧自五天來講
次花飄席齋餘鳥下臺萬民共行樂終讌首慵迴

我愛昭州路優游不險崎九疑通舜野八桂遶秦祠亭
堦相望處漁樵有讓時政無牙虎鬪莫信義山詩

我愛昭州角嗚呼右郡衙萬愁縈桂水一曲咀梅花調
古湘雲叶聲乾嶺月斜今愁并古恨吹起落誰家

我愛昭州月閒宵入綺樓涼生荔浦樹冷熨桂江秋朱

戶千家啓浮雲萬里收誰誇魏公子飛上鄴門遊
我愛昭州樂供官不在多薰風齊樂聖淑氣且宣和謁
廟知神格鋪筵喜客過聲邊無一事對酒謾高歌
我愛昭州酒千家不禁燒縹醪一爵舉瘴霧四時消紅
葉和雲踏青帘傍水招化濃民自醉鼓腹日歌堯
我愛昭州果西東此擅珍荔枝登宴美桂子薦盤新映
樹珠含影承牙玉溜津二年遊宦樂滿腹嶺南春

北牖洞

孫抗

舊駐東方騎因題北牖名來須風作御去認斗爲城日
氣晚方到雲收寒易生子心匪游衍拱北振華纓

白雀洞

禽貴羽毛潔地憐巖壑幽名非華陰凍景似秀林秋不
覩書塵繼空驚歲月迺何如穎川鳳千古冠緹油

南華洞

峭徑入蒼烟他山盡一拳上盤朱鳥翼中寓漆園仙清
可携壺賞涼堪拂石眠九疑生接境曾此按薰絃

朝陽洞

險絕信天開春蘿蔭古苔不愁雲影閉先得日光來片
石充碁局涼坡遞酒盃東風偏著意草木爛成堆

嘉蓮洞

地應連海眼終古蓄寒泉四列青蒼壁雙開菡萏蓮已
嗟真賞去猶訝昔香傳未媿東林下霜葩社衆賢

夕陽洞

塵寰雖未遠，顛氣覺偏滋。日落鳥歸處，秋高風勁時。吟餘下天籟，坐久凜冰肌。信是棲幽境，涼蟾照履綦。

送容州杜祕丞

余靖

宦滿一舟歸，高懷背俗馳。家藏唯翰墨，民政在聲詩。秀

陳生為詩言政甚詳氣勁秋霜並，吟多夜月知。知賢無路薦，何以

報明時

過清湘

陶弼

嶺開蠻壤斷，此地下湘川。綠水紋如染，丹楓色欲然。瘴消還愛酒，兵解尚憂邊。故里誰相訪，孤帆出曉烟。

霞溪驛

歌聲野色中人樂，歲時豐暑雨陰晴。雜秋田早晚同，嶺雲無烈日。江樹足涼風，自指鄉山語。前村有路通。

二妃廟

溪上龍蛇屋，蕭條帝女祠。竹痕當日淚，山色後人疑。古服霞流綺，新妝月獻眉。楚民無水旱，簫鼓謝神禧。

題興安縣石灰舖壁

馬度嚴關口，生歸喜復嗟。天文離卷舌，人影背含沙。江勢一兩曲，梅梢三四花。登高休問路，雲際是吾家。

再至陽朔

五管新多事，輕車屢往還。勤勞成白髮，故舊是青山。樹色纔分楚，江聲未出蠻。自慚迎候少，無惠及孤鰥。

送臨桂令戴若納出廣
五嶺生還少無辭酒滿觴共經邊寇事先出瘴烟鄉楚
樹蟬聲早湖天日影涼此行休問路官闕斗杓旁

送桂林余靖侍郎移帥長沙

戈船不用兵鼓角下湘靈草歇初春雨天迴奉使星江
蓴波上紫楚木望中青欲轉湖湘去家山在洞庭

送陽朔尉王翊還東海

勞生如嶺水嶺盡忽分流草色湘中路潮聲海上洲少
孤家有法官薄鬢先秋我亦嗟貧病相期江漢遊

寄陽朔上官凝明府

嶺上一揮手蠻村花又疎閑思昨夜夢勝得舊年書地

志烟嵐裏官資州縣初詩成好相寄江水接靈渠

寄桂帥趙待制

一紙降書落天恩寵作州舊疆分海界新額上城樓古
塞南唐詔荒祠蜀武侯前朝聲教地自是北人愁

寄陽朔尉輔臣

將斧征蠻歲儒冠破賊初日邊呈瑞氣夜半得降書許
國心非淺封侯望已疎相逢感秋病眷眷舊溪魚

山口欄蠻山

西去萬重山茲峰獨限蠻天生賊多計民賴汝爲關設
險數州地防危一日間守邊須以道絕頂可躋攀

永平寨道中

壘嶂深千里窮邊今一隅北風家信息南斗客程途嶺
勢頻開合猿聲乍有無過溪人語笑隔岸戍烟孤

送呂濤典獄之梧州

峽口蒼梧縣城依南斗魁江潭海潮上地熱火山來草
沒嘉魚穴雲封拜表臺到應無獄訟荳蔻酒頻開

容管

一年勾漏守尋盡洞中天佛記盧藏用仙壇葛稚川醒
心西驛水燒眼碧池蓮我豈無新事詩碑與酒泉

自注郡有

勾漏白石都嶠等山所謂三洞天也盧藏用大雲寺記
石高丈二尺西驛韋丹建閣下有石泉并記後唐李復
作池植蓮數萬

南寧崑崙臺

落照古城隅邊風動隼旗久閑忘戰略多病熟醫書老
髮隨年短新情與世疎桃花春水暖誰釣舊溪魚

早登崑崙臺望戎兵北歸

春風歸未得默坐廢臺間居易衷腸結安仁兩鬢斑蜂
銜新藥去燕引舊雛還帳下誰更戍旌旗出亂山

南寧崑崙臺

江國家書少秋臺閑草生無人來遠渡盡日上高城落
照懸魚市孤烟起戍營東籬故園菊又向酒中傾

南寧崑崙關

關路下崑崙巒蠻封迤邐分春光偏著草雨意不離雲俗
異君修德時平將用文臨溪照綠水老鬢雪紛紛

三公臺落成飲其上

北原喬木外三將舊屯營草沒金鉗蹟山應玉管聲路
隨關地起江背瘴天傾異日誰相繼來書第四名

那霸泉

昔年觀地志此水出牂牁斷岸深無底平流暗起波感
恩來客少射影短狐多未老諸蠻在樓船空再過

羅秀山

尋山入羅秀旋結草堂居花露生餅水松風落架書聞
猿得句後見月出行初此夕雲林下無因夢使車

會仙崑

寂寂長冥洞涓涓漱玉泉鳳簫聞夜半鶴馭認雲邊煮

茗尋安老披叢訪稚川於中得消息何用買山錢

思明府明江

幾年來瘴外此夜宿溪中照枕殘雞月吹燈落葉風盧
循猶僞國楊僕已衰翁起戴寒星去前村燒影紅

和石灰舖壁間韻

王樞密

時事遽如水無言只浩嗟三年避兵火萬里走塵沙禦
瘴猶須酒傷春不問花茫茫雲水地何處可爲家

送向綜通判桂州

范仲淹

通籍三公後監州五嶺深欲知明主意將慰遠人心歲
計多藏藥舟行不廢琴歸書清白最寧問橐中金

挽桂林戴別乘敦常

蔡襄

杖履何年別松杉古道傍城山秋月盡南嶺暮雲長古
調愁難合孤根老易傷欲將數行淚重至鄭公鄉

暢巖

姚嗣宗

石作峒房勢水隨人意流兩巖長濺雨五月便驚秋此
景多深趣吾心真樂遊山翁中宿酒欲醉五更頭

訓桂林從叔

賀鑄

江到三湘盡山圍八桂深龍蛇寒不蟄霧露晝多陰迢
遞馳梅信殷勤訪竹林淮南風土美留滯亦何心

能仁寺

黃庭堅

招提古山鳥掩映碧江心鐘叩蘋風遠僧禪水月深鶴
歸門外浴龍向檻邊吟每遣遺詩者毋忘撥棹尋

挽鄒忠公

楊時

一伏青蒲上三年瘴海濱泉甘不出戶客至豈無神報
國心常在知恩志未伸追懷垂絕語空有淚盈巾

龍興觀有感

鄒浩

自罷龍興節人間幾歲窮偶觀塵榜暗追感御爐穹萬
事遺高躅三清肅下風鈞天在何許猶與夢魂通

見魯直題陶商翁碑後有感

碑在興安
石灰舖

石上猶新墨忘情亦歎嗟殊恩但歸骨冷迹尚平沙願
力消塵垢瞻依盛寶花人間幾行淚空灑玉川家

容南道中

李綱

路入容南境風烟自一方山空雲冉冉春動水茫茫紫

府丹砂祕幽村碧樹芳蕭然有佳致作箇是炎荒
訾家洲 張孝祥

一雨便清涼風回百草香雲山米家畫水竹輞川莊僧
賦蠲新帖墻榛斬舊行蹄韉乘晚霽空翠滿輕裘

過靈川

塵沙行半日烟火是靈川縣只三家市渠通大斛船官
空無現俸稅重有荒田太息王郎子棲遲欲四年

湘山留別

折彥質

寓久渾忘客臨行似別家途窮身更怯秋老鬢先華生
計黃茅合歸期碧海盼湘山今夜雨留我意無涯

湘山

韓駒

湘南第一境山水足娛人塔占飛來石僧留過去身雲
泉蒼壁曙竹樹絳園春羨爾安禪客翛然不受塵

劉仙崑

曹輔

石磴仙巖路登臨莫倦攀亂泉歸萬壑一目盡千山嶂
雨收雲後松風吹莫還道人今不見無處覓玄關

聞寇至初去柳州

曾幾

剝啄誰敲戶蒼茫客抱衾只看人似蟻共道賊如林兩
岸侔千里扁舟抵萬金病夫乘下戀萬一有佳音

疊綵巖登越亭

朱晞顏

不到越亭久榴花今已紅江流寒瀉玉山色翠浮空百
越薰風裏三湘夕照中行藏仗忠信六合本同風

送丁懷忠教授象州

二毛羈旅久一飯瘴鄉輕把酒時相屬令人意自平校
官無簿領帥閫甚聲名所恨冥冥兩梅天不肯明

仲春過陽亭

張 栻

亭古危臨岸林幽巧近城烟容隨雨住花片著溪清春
事已如許客懷誰與傾亭前兩好樹滿意欲敷榮

堯廟

明祀崇千載荒山拱萬靈插天巉絕壁飛瀑下空庭繪
事存淳古真風寄杳冥蘋蘩何以薦帝德日惟馨

送但能之守潯州

循吏古猶少嶺民今未蘇丁寧煩詔旨推擇得吾徒根

本誰深念詩書計不迂惟應敦此意豈但應斯須

送陳仲思叅佐廣右幕府

舊說桂林好君今幕府遊江山資暇日梅雪類吾州煮
海何多說安邊更預謀政應勤婉畫不用賦離憂

寄趙漕

想得昭潭上兒童夾道迎皇華今日使竹馬舊時情梅
蘂冬前折山光雨後清使君桃李客當爲駐車旌

蒙亭二首

孫 覲

小築三間足雄包萬象并遙波通極浦落日抱孤城小
語千巖應長歌百蟄驚坐看衣屨上漠漠晚雲生
落拓詩酒畔疎慵粥飯僧盪胷開遠抱拄頰見高稜鳥

倦猶聞語蛟寒正可醫一區如可卜吾不愧陳登

九日次獻花鋪

李衛公貶海外道過象江蠻女獻花於此

古路三义口青裙兩髻丫更無陶令菊空想衛公花破
屋堆黃葉清江縹白沙殷勤邀一醉蠶酒壓黎楂

珠塘

未至清湘二十里

范成大

林茂鳥烏急坡長驢馱鳴坐輦猶足痺負笈想肩頰廢
廟藤遮合危橋竹織成路傍行役苦隨處有柴荆

宿清湘城外田家

驅馬力猶強就牀身始疲浮浮雲拂帳滴滴水鳴籬未
熟燈前夢閑尋道上詩湘中多夜雨客枕最先知

紅荳蔻花

綠葉蕉心展紅苞竹籜披貫珠垂寶絡剪綵倒鸞枝几
入花欄品休論藥裏宜南方草木狀為爾首題詩

宿深溪驛

北戶書頻到南雲鴈不飛試評騎馬路何似釣魚磯擊
柝黃茅店篝燈白竹扉故園桑柘煖亦有稻梁肥

觀靜江山水呈陳魯叟漕使

戴復古

桂林佳絕處人道勝匡廬山好石骨露洞多崑腹虛崢
嶸勢相敵温厚氣無餘可惜登臨地春風草木疎
昨者登梅嶺茲來入桂林相從萬里外不負一生心湖
上千峰立樽前十客吟譏評到泉石吾敢望知音

送湘漕趙蹈中寺丞移憲江東

持節復持節因循霜鬢侵盛衰關大數豪傑負初心宇
宙虛長算江湖寄短吟番陽秋水濶湘浦未爲深

融州東樓

陳藻

燈火無蠻市江山遶暗城漁舟關柝響野燒日頭生雨
濶千村暝天高一月行夜樓多好景都不礙陰晴

全州

劉克莊

寂寂全州路家家荻竹扉吳僧留塔在過客入城稀傳
舍臨清泚官亭占翠微沙頭泊船者多自嶺南歸

巖關新洞

羽客初尋見因于此葺廬未能平險峻先擬架空虛磴
路樵相引山名尉自書看來臨驛道未必有仙居

訾家洲

來訪唐時事荒洲暮靄青徧生新草棘難認舊池亭毀
記欺無主存祠怕有靈今人輕古迹此地少曾經

初遊水東諸洞次同遊韻二首

桂山前未到今日是初游招鶴登青巘呼龍俯碧湫深
溪通秉炬小竇劣容舟豈敢輕題詠同官盡柳劉
舊聞崑洞勝欲往自髫年聳秀過靈隱幽深似善權遠
環州堞外近獻屋簷邊倘有登臨約時時願執鞭

堯廟

帝與天同大天存帝亦存桑麻通絕徼簫鼓出深村水
至孤亭合山居列岫尊尚餘玉階意樵牧踐籬藩

舜廟

粵俗人知帝遺祠古至今青山花寂寂朱戶柏森森
雨打荒碑缺苔封石洞深曾聞張侍講來此看韶音

清惠廟

來訪古祠宮迢迢過水東一條溪不斷數里竹方通
巫拜分餘胙商行禱順風妝樓空百尺半仆夕陽中

脩然亭

每到欄干畔徘徊暮始還爲憐鄰水寺盡見隔城山
牆繚青苔裏舟藏綠樹間松扉宜步月只是限重關

蓼帶亭

上到青林杪凭欄盡桂州千峰環野立一水抱城流
沙

際分漁艇烟中見寺樓不知垂去客更得幾迴遊

送陳魯叟使君赴廣西漕

闔郡留無計匆匆奪父師使君三月政遺老百年思
遠宦生華髮輕裘載舊碑海山應有恨未得謝公詩

送趙叔愚赴潯州理掾

未奉三雍對聊爲五筦行鄉書踰嶺少詩思入湘清
遠宦身差穩中州事日生向來幾離別此別最關情

哭桂州譚戶錄二首

讀過書皆記非惟善屬文有名登進士無命作參軍
白髮行秋暑青衫殮瘴雲可憐膏火下虛費一生勤
曾次有千年囊中乏一錢客來論旅殯官爲顧歸船通

德梳新髻童烏拾舊編傷心鄰巷裏廢宅鎖寒烟
寄雲林楊少雲自衡之桂 鄒登龍

問訊楊夫子經年客異鄉南浮湘水遠西望楚天長五
嶺梅花發孤城草色荒白雲遙滿目曷久住炎方

龍隱巖

方信孺

石門元不鎖巖屋本無基九夏花猶在千年樹倒垂僧
閑方定起客到每歸遲甚欲眠蓬葉沿崖續斷碑

蒼梧卽事

謝公孚

近岸江聲急孤舟下杳冥峽泉飛暴雨灘石走羣星水
有瀟湘色猿同巴蜀聽令人思舜德一望九疑青

遊東觀

呂愿中

郊原同按轡杖屨陟青冥山色混林樾溪光照斗星
峰高插戟兔徑曲穿庭□□一聲遠千崑特□青

題西山

曾宏正

足倦尚躋攀南來第一山撐空列岵峩拂閣聳孱顏莫
作炎山看渾疑雁蕩間輸他癡衲子終老白雲關

閩相可翁先生偕王人有湖山游獲侍坐先生有
詩輒用韻 豐蒞

西郊陪袞繡雲步入千山行樂五星聚浮生半日閑尋
棊楓葉下載酒藕花間譚笑長城在何人敢度關

題西山

李曾伯

玉筍環星拱青螺帶霧披山爲天下勝境占嶺南奇援

筆難窮者凭欄盡目之不因無世累築室在於斯

余再牧桂之明年實開慶改元上命三衢柴土表

基視邊隘竣事將還夏六月二十一日約憲倉四明

豐蒞兵帥汪光朱廣用符離朱煥載酒千山觀訪

招隱過仙弈感今懷昔風物固亡恙也時火傘張

空水花蘸碧相與徜徉其間清不受暑得四十字

自重來嶺嶠豈暇訪湖山緹騎行邊了戎旗護戍閑相

看羣玉外一笑六郎間回首西風靜何愁老漢關

淳祐庚戌因勸農來白龍洞得四十字是日微風

扇和輕雲閣雨千峰翠滴四野綠秀林禽對語春

意駘蕩無極徜徉久之緩轡而去

老龍昔未蛻嘗蟄此山中霖雨春疇足風雲夜壑空兩
崖高下倚一徑往來通不願千金劑惟祈百穀豐

挽鈍齋先生許象州

李昂英

家學存齋授淵源自晦庵

存齋公伯祖也晦庵為名齋且為之記

魁文行

海內師道重天南銜得冰條一州纔刀夢三芳名却千

載俎豆拜祠龕

義重人誰及高風有古人已田分友子

友人林司法初筮西廣終于官

妻子貧先生割己田贍之黎事保羈臣

顏郡守羈廣西先生以經幹告身保薦顏起廢撫定黎峒

有功朝廷嘉之授瓊筦守抱負耕莘志依稀陋巷仁丹青遺像在難

寫道心真

丈席卽之溫終身佩一言棟樑失安定山斗慘韓門慟

矣心喪重淒然手澤存江聲助悲些莫返大夫魂

靈巖

呂源

憶別老君洞今逾二十年重來持漢節又復冒蠻烟風物總仍舊霜髯徒自憐不如歸去好趣辦五湖船

彈丸山

陳讜

地迴山奇怪神仙喜穴居百雲剗洞巧五石補天餘商野幽人夢周南太史書心乎愛丘壑勝概一躊躇

過梧州

易謙

城空花爛熳樓向雨蕭條毒草春生瘴蠻江晚上潮魚肥堪把釣鳳去不聞韶萬里雙持節恩波賴聖朝

逍遙樓

建都思

逍遙留古迹勝景浩無窮霧鎖山城市烟藏水府宮峰巒霄漢外棟宇畫圖中百草叢深綠羣花綻淺紅

湘山寺

雷隱翁

何代梵王宮軒窓闕碧峰虛庭蒼蘚匝一徑白雲封石澗吞寒竹崑猿答暮鐘能令吟賞者不倦往來重

柳州道中

元陳孚

五嶺炎蒸苦征夫各陣行荒哉秦象郡痛矣柳龍城水毒人多病烟昏馬易驚里閭凋瘵甚邊將莫言兵

度三花嶺

絕壁三千丈荒烟八九家黃茅青草瘴黑質白章蛇橄欖高懸子芭蕉倒吐花嶺頭一回首何處是京華

桂林

傳若金

桂林南望遠山路與雲連淺水清涵石攢峰亂刺天干
戈仍歲月瘴癘接風烟蠻寇何能定邊氓亦可憐

送鞏志道桂林憲使

憲使才名舊南遷歲月遲湘中獨發夜嶺外早行時暑
雨過榕樹涼風起桂枝殊方慎寢食莫遣鬢成絲
相見嗟已晚相知情獨真一生多好直終歲少言貧豈
是輕微祿祇應念老親送君徒悵望心迹不堪陳
五嶺連烏府羣賢列繡衣閉門文史足巡郡簡書稀日
月明丹徼風霜滿翠微時時念疎遠吾道亦光輝

梧州嘉魚亭

舟楫回沙驛旌旗駐郡亭江通五管白天落九疑青此
日瞻雲氣誰家見客星軍需晝夜急寇盜幾時寧

賓州

過嶺冬猶熱緣山夜未寧樹殘兵後赭草發燒餘青西
寇迷仙霧南人候使星民居日稀少惟見短長亭

答別龍州蕭從事韶

北極絲綸下南陲政化通靈槎浮度斗瘴草偃隨風殊
俗難爲別清談喜屢同馳驅不可住心切大明宮
使節明金虎腰弓偃畫蛇蠻夸趨號令原隰見光華邊
樹猶含綠江梅久放花憶君依幕府何日定還家
交州還聞柳州破道阻將泝江

交趾方通使賓州忽被圍還聞山路塞徑就水程歸上
府空金碗前軍老鐵衣誰能平政化不事總戎機

別靜江文學諸公

乍見先愁去將行未忍分字期歸後寄歌畏別時聞驛
樹過春雨江船隔夜雲驅馳念吾弟羽翼待諸君

和智禮部早發興安

早發興安道人瞻奉使槎雨來鳴近樹雲去落誰家解
纜眠看竹哦詩坐煮茶歸程足幽意莫向市朝譁

仙李洞

詹士龍

八桂棲霞洞穹然自渾成豐隆昭良靜空洞合離明壁
隱龍潛滑脂凝鱖尾清仙靈杳何許登眺暢幽情

書堂山

陸 垕

何年柳使君開此讀書林天地三江遠烟雲一徑深高
山仰聖道流水靜人心伊昔從游樂遺風尚可尋

發橫浦之永淳縣

范 梈

急漿開晨漲孤尊已夕陽水光排峽靜洲勢背城長太
史才無敵將軍義不忘感傷今歲月淹泊愧滄浪

逍遙樓

伯篤魯丁

身世雲霄上飄然思不窮晴山排翠闥暮靄闕琳宮牧
笛殘雲外漁歌落照中蓬萊凝望眼隱隱海霞紅

老人巖

燕山月魯

幾年混元境曾見繡衣遊刻石俯丹井題名瞰碧流我

來尋古蹟魚躍上扁舟還是夙緣否真仙微點頭

逍遙樓次韻

吳伯寅

危樓天欲半登覽興何窮雲鎖崑崙塞星環太乙宮江山圖畫裏賓主笑談中回首巖城暮千門日影紅

七星巖

李弼

乘興上東山天風拂壯顏七星連地脈一竅透天關玄鶴何年去丹爐盡日閑我因厭塵俗到此不知還

門人靈川秦穆思校

粵西詩載卷十

粵西詩載卷十一

奉直大夫前廣西桂林太平兩府通判汪森編輯

五言律

梧州道中

明嚴震直

候吏動征旆船窓曙色明冠纓凌海氣書劔帶潮聲擊楫花迎笑揚帆鳥不驚行行天上坐江漢自澄清

渡繡水取道赴高州

劉嵩

日出城烏起風高驛馬鳴山從雲際起人在樹間行溪畧窮深捕畬刀廢薄耕見人茅屋好渾欲愧平生

憩金雞驛亭

綠雲上驛亭春色正冥冥千樹棠梨白滿山蕉葉青碧

潭開匣鏡秀壁擁帷屏尚說容州遠舟行未可停

下馬

下馬度嶽峯千溪復萬林含沙疑鬼箭飛草畏蜺鉞火
種通獠俗山歌雜獠音逢迎暫投息起坐劇愁心

發梧江驛

韓守益

早發梧江驛新晴宿雨收暖風寒食後啼鳥綠陰稠到
處停蘭棹逢人問象州隄防多鼠盜終夜整戈矛

懷遠縣

治平今有日因得遠人懷一水泔河遠千山翡翠開竹
祠依澗壑縣郭半雲霾我正詢民瘼苗頑莫浪猜

謁羅池廟

嘗聞柳州柳今到柳州城謁廟雙旌去看碑百感生遠
人嚴祀典遺像著高名庭樹參天綠神來瘴癘清

遷江縣

駐馬遷江郭懸旌映落霞山危開八寨縣小只三家望
望依前戍嗚嗚起暮笳晚涼生解宇中夜夢京華

蒼梧卽事

林 弼

駐馬蒼梧野雲烟半杳冥荒林虞舜廟斜日呂仙亭城
枕三江險山連百越青長歌舒逸興激烈振林垌

送曾主簿之平樂

高 啓

路出桂江東鄉音想未通蛇飛山苦霧鵬運海多風木
魅長欺客花蠻少學農縣廳何處在椰葉晚陰中

樂川官舍

習韶

嶺海南天遠西風獨倚闌
清秋蓬鬢短昨夜井梧寒
書札雲邊夢江流物外觀
南山松桂子一一報平安

邕州

王偁

五管推名郡雙江接上游
人家蠻霧曉山雨瘴烟秋
遠客誰青眼殊方易白頭
今宵南極外分野望牽牛

送沙子進赴祿州別駕

客舍酒初香都門柳色黃
一官仍別駕萬里赴炎荒
江路猿聲早山城榕葉涼
遠人勞撫字且勿厭殊方

浮大江之廣西途中作

藍智

慘淡西門別蒼茫廣海行
微風孤棹遠落日大江清
鴈

帶還家夢雲留戀關情悲
歌一迴首出處念浮生

宿陽朔山寺

晚景孤村僻松門試一登
秋山黃葉雨古寺白頭僧
壞壁穿新竹空牀覆舊藤
宦情與禪意寂寞共寒燈

宿蘇橋驛

桂嶺愁人地梅花歲暮天
孤雲寒雨外獨鳥暝鐘前
牢落空雙鬢驅馳又一年
觀風愧無補爲客記山川

柳州道中

窮荒持憲節侵曉策征驂
落月千峰外清霜五嶺南
草寒初息瘴林曙欲浮嵐
巡歷知無補艱難頗自諳

柳城道中

霜氣晚淒淒荒岡恐路迷孤雲桂嶺北落日柳城西地
暖蛇蟲出林昏鳥雀棲蠻鄉經戰伐問俗愧遺黎

恭城縣

十室黃茅邑千峰紅葉村喧卑蠻俗異質朴古風存雞
犬連猺洞牛羊到縣門殘年歷荒徼遙布聖明恩

過雲洞嶺

路出千林迥山連五嶺遙石崖懸度棧野樹臥通橋澗
飲猶防蠱畚耕盡屬猺夕陽驅瘦馬鬢影漫蕭蕭

柳城縣

青山入縣庭小邑但荒城竹覆茅茨冷江涵石壁清草
蟲當戶墜木鳥上階行問俗知無事松風一舸輕

出雲藤驛

又出雲藤峽扁舟更向東地蒸秋有瘴江濶夜多風旅
夢驚啼狝鄉心託斷鴻天涯看月色不與故園同

來賓縣曉發

宦遊同逆旅侵曉逐征途空館殘燈小長江落月孤鄰
雞催去馬城柝起棲鳥物色兼人事匆匆歲欲徂

懷川晚立

清川繞縣衙小立共汀沙暝色催歸鳥春愁對落花江
湖頻戀闕風雨更思家出處成何事惟添兩鬢華

晚立懷友

野曠行人絕林空墜葉聞客愁當落日詩思入寒雲草

暗防蛇毒山昏過虎羣梅花萬里道歲晚正思春
宿賀州黃家洞瑞崑寺清溪茅屋悠然有故山之
景

怪石分羣壑清溪共幾家衡門散雞犬古寺入桑麻薄
宦知無補浮生信有涯白鷗藍澗曲春水遶桃花
雨中同孟原僉憲登嘉魚亭

高閣流鶯外荒城駐馬前江寒三月雨春老百蠻天折
柳悲橫笛飛花落釣船乾坤總羈旅把酒意茫然

送胡元節廣西憲使

楊士奇

驄馬赤茸鞦臨岐嘶未休朝廷用儒雅風紀得才猷天
遠三湘外霜含八桂秋貪漁嗟薄俗表率在名流

送友人廣西省親

張 埭

壯志在遊遨寧親豈憚勞水經湘浦濶山入桂林高柳
色迷蘭棹花香入茜袍東風吹別曲離思滿江臯

贈鬱林州判

金幼孜

鬱林渺何許遠在海西頭念子有行色離情逐宦遊曉
雲隨綵旆夜月引仙舟好爲宣王化從容展壯猷

出鬼門關

朱 琳

北流仍在望喜出鬼門關自幸身無恙從教鬢已斑昔
人多不返今我獨生還回首瓊山縣昏昏瘴霧間

西山

萬 霽

數里西山路千家夕照村霞光迴樹杪山影倒雲根吏

少空庭舍人歸附郭門地偏風俗好雞犬任黃昏

仙李洞

陳輝

玄巖何太古洞穴更虛明宇宙初開闢山峰已孕精縈
紆隨地轉磅礴自天成此日同登眺吟餘思倍清

陽朔東嶺

何佐

我愛陽川好朝霞絢嶺東九光期遠嶂五色麗晴空初
擬祥雲並還疑絳錦同海風吹不斷常伴日輪紅

長生湧翠

梁能定

長生多占勝巒嶂觸眉低匝地青茵布連天翠羽齊修
篁常濯濯瑤草日萋萋幾度春容媚花香襯馬蹄

鷺翎應禱

鷺崑多爽塏洞口最玲瓏隱隱霜翎起涓涓石乳鍾有
神孚應禱無衲寄行踪反復登哦咏人在翠華中

青山晚照

青山如列戟一帶勢崔嵬落照紛紛去斜暉冉冉來江
中魚棹急途畔客心催迢遞層陰起山猿處處哀

貓嶺朝霞

貓嶺高如峙陽烏每上遲翠華鋪玉案光彩絢金機郁
郁天門蕊菲菲絕頂摘須臾收斂去應與白雲齊

南津晚渡

岑方

南津官渡迥天晚起蒼烟負擔客爭路立沙人待船風
波無定日衣食足何年借問營營者誰謀早濟川

鰲頭山

錢溥

江上蟠桃石雄吞北郭陲中擎天一柱獨障水東馳霖
雨多需望風雲每護持憑誰一點化高躍向天池

青連山

萬疊山如障城頭翠作圍玉龍隨瀑挂玄鶴伴雲歸謝
屐遊難遍陶籬見亦稀倚欄看不厭嵐翠濕人衣

白雲洞

野外尋仙迹雲封古洞幽碧桃時在澗瑤草不知秋道
路通三島烟霞占一丘有無誰可必明月自悠悠

隴口樵歸

青山幾樵者荷擔出林墟夕照歸鴉後秋風冷葉初爛

餘王質斧讀盡買臣書伐木歌聲裏應當爲起予

山寺僧燈

祇園全盛日深夜佛前燈影亂星千點光搖月幾層續
傳心境破寂照怪淵澄欲問叅禪事嗟今已不能

石門漁唱

黃諫

向晚孤城北漁歌起石門聲從蘋末起遠向耳邊聞烟
浦燈光爛沙汀笑語喧誰知崑瀨叟不肯戀華勛

綠樹神湫

隔江深澗底榕葉鬱青青神物深潛處清泉自有靈惠
能蘇萬卉勢欲捲南溟村洞祈年者時來倒醪醢

南津晚渡

董應軫

夕陽芳樹外一葉泊清灣爭渡村夫健謹呼土語蠻未
聞供役去盡道趁墟還載月蘆花渚蓑衣一夢閑

筆架晴嵐

鄭宗維

羣峰恒吐氣非霧亦非烟練淨崑前石光浮雨後天鶴
歸遙認樹豹隱不知年合作文明兆英才筆似椽

送劉淵赴任南寧府佐淵嘗從予學先任廉州同

知

劉定之

梧江南去近佐治古邕城琢玉當年學還珠邇日名携
家無後慮報國有前程時復嘗榔酒同僚話至情

送張布政文昌慶聖節畢還任廣西

持憲陞藩牧名馳楚越鄉朝天伸敬愛繞電際休祥鳴

佩寒辭薊飛舸暖溯湘莫言淹外寄寵召入巖廊

成化七年春二月十有八日余與總鎮太監陳公

總兵官平江伯陳公視耀武揚威關二公留款慶

林寺寺前山坡之上其平如掌下臨長江旁列茂

樹衆登覽爲之躍然喜勝地之偶得感二公之高

情而慨念時事遂及西師不覺浩然興發因作一

詩書貽寺僧同游者參議王孟育馮文綱也

韓雍

巖關閱初遍下馬憩禪林樹覆連天幕泉鳴隔澗琴憂
民成老疾報國喜同心聞道西征急何時聽捷音

送龍州樊使君

王越

萬里龍州路冥冥烟霧深山峰迎去馬野燒隔平地
遠官無法民豐橐有金相思明月夜愁聽幾猿吟

挽全州蔣隱君友人蔣良之父

丘濬

高人厭世氛一夕斂天真花落閒庭晚鳥啼空谷春藥
囊餘舊劑茶竈冷香塵埋玉湘江上悲風起白蘋

和廣西吳憲副

李承箕

我本楚狂人荊州此識君雲山還昨夢世路與人分短
褐曾嫌醜虛名自愧聞兼金數字至高義激浮雲
無民不清靜有吏與歌謳古調何人會明公是此流長
風破巨浪孤影落虛舟獨倚闌干月幾回明遠樓
繡斧昭州路開荒透密蘿陰符兼老子劒術漏荆軻竹

護新氓舍烟消舊獠窩倘餘經略此不惜重經過

桂林守梁文振聞予調柳遣人邀迎至永幾千里
視落落不相存顧者相去遠甚人回作詩致謝

桑悅

爲客寬懷處邦君在桂林看人相冷面走价遠迎心雪
洞篇章淨灘江道義深緇衣詩久廢千古只如今

游南山

甘泉

石室開神斧鴻濛景尚新扳緣入巖洞仰視見嶙峋野
鳥鳴高樹花開笑暮春丹爐烟竈冷應說二仙人

藤江

黃鎬

藤江行幾日不見有人烟兩岸山如壁中流水似弦鳥

啼深樹裏船繫急灘邊遙望容城路淒涼思愴然

弘治己酉行人差廣右

丁養浩

授職居燕北承差出廣南過時須自檢在處卽爲安莫說炎涼事休誇冷熱官平心憑造物立向靜中看

送方文晬省父歸柳州

蔣冕

萬里頻懸夢高堂九十翁養能榮一日官不換三公衣舞花前豸門迎柳外驄平反多少獄一笑醉春風借問龍城路何人驄馬歸靈椿榮壽域宮錦製春衣事爲鄉邦重恩添草木輝移忠應有訓莫戀故山薇

適然亭

鄭岳

隙地纔尋丈鋤荒構此亭軒臨一水碧簾捲數峰青竹

笋穿階出蟬聲隔座聽晝長公事少恍若在林垌

送節推曾良忠之蒼梧

葉元玉

天涯岐路別何處是蒼梧梅嶺蠻烟淨藤江月色孤獄清閒狴犴波靜息天吳莫歎炎方遠乾坤亦版圖

伏牛嶺

章拯

落日渡牛嶺歸禽相與還雲吞山一半路沒水中間村落多稱寨行人每怯蠻羣黎入版籍嗟爾一何艱

蘇橋驛次韻九龍山史

魯鐸

駐節灘江驛寒燈共夜深一年長至日萬里故園心客路妨清賞夸風入短吟君才吾避地行復重雞林

過大關

大關惟線路躡磴上崔嵬雲觸車簷起泉從樹杪來寒
輕花繼續濕積蘚毯邈遠道逢奇勝奚囊取次開

思籠驛見螢

不省南荒地窮冬尚有螢草中初訝火山外復疑星寒
暑今難信乖常自合經少陵如見汝愁思益難勝

上林道中

山路奇還險肩輿阻復通有時疑墮井忽地欲凌空襟
袖雲中氣旌旗樹裏風獨憐寒暖候不與故園同

崑崙關

路出崑崙上中林不見天巢卑幽鳥護樹老怪藤纏空
翠疑成滴陰崖戒近邊前驅知不遠鬢篋隔蒼烟

宿陸川學荒陋甚矣慨而有作時上司不至者六

十年

周用

五紀公巡少十科人望孤鱣堂猶倚席雉堞不弦弧白
石未堪煮黃猩亦解呼高軒且珍重簷雨濕流蘇

庚辰四月二十二日謁陶忠烈祠是夜夢青天白
日心無愧遂次前韻足成

白日心無愧清朝節更孤裹屍餘馬革齋志畢桑弧廟
貌猶生氣窮泉不可呼麒麟如可畫接席漢臣蘇

正德庚辰四月二十七日廣西進兵

先捷猶天幸懸軍勢不孤膏脂饒粟帛老弱戒弦弧五
月方誅戮三苗復嘯呼未聞堯舜日亦復望來蘇

自覃村至陸川縣頗涉荒險

百折但途淖陰厓行色孤驅車防斷石射鬼詫張弧淺
薄嗟何補顛危痛欲呼陸川今夜雨容我夢姑蘇

望勾漏山

令尹宜勾漏丹砂道未孤謾尋燒藥竈不用射狼弧紫
氣游龍遠青林啁雀呼何人能吏隱吾亦念吾蘇

赴南寧謁諸部使

鄧炳

部使期交集先聲著督郵書隨人共至船與水爭流崑
岫烟生暝炎荒夜作秋安邊三五策容可備咨諏

新莊道中

慣作周流客新莊幾度過泉聲寒瀉玉山影綠搖波江

曲添程路風和送棹歌獨憐漁父拙鼠網避鼯鼯

送鄒參議敏行之廣西二首

徐問

曉日動行節離情滿客杯秋分晉陵路吳盡越王臺桂
水蠻江入蒼梧毒霧開極知行省貴天遣出凡材

秩轉金緋重君來尺五天衣冠通桂嶺舟楫帶湘川海
舶千家市春畚萬井烟相思誰更切書寄北風前

龍門驛

險仄灘江峽龍門驛路通軍麾沙水上春色瘴烟中深
樹埋豺虎窮荒絕鴈鴻天山勛亦壯吾欲挂雕弓

懷黃提學才伯接節梧州將棄官歸

叔度風流遠灘江復見君頻年少知己長日念離羣碧

月潭前水蒼梧嶺上雲何時還促駕深酌細論文

送王先輩納言歸柳州

祝允明

携將柳州劍獨下瀟湘船千里景千變一山詩一篇離
橋梅子兩歸棹桂花烟重會雲霄上都纔二年

贈柳州桂二守

巖 嵩

南登桂嶺道却上楚鄉舟賦就江離晚書回旅鴈秋山
形攢劍戟方語雜旃裘好種江邊柳還將惠化留

喻大行宗之靜藩祭葬別贈

宗藩勤卹典漢使下彤墀雲捧青霄節山開碧殿祠桂
江題句勝藤浦繫舟遲聞有慈幃別重歌四牡詩

送李正郎之廣右提學

冠蓋三春別雲山百粵程草齊疑礙馬花暖欲啼鶯簡
擢儒臺重遲迴省署清相知誰復似不盡送君情

題風洞

寧知巖洞古平臨闔闔中梵閣開丹鷲仙梯躡彩虹遙
峰晴吐霧陰磴靜含風安能賦招隱來扳幽桂叢

題虞山廟

重華千載後遺廟在南夸絃想薰風奏庭思鳳鳥儀斷
碑苔蘚合幽洞薜蘿垂髣髴移仙駕乘雲度九疑

虞山宴別

臘二十五日發桂林方伯何君珊憲使宗君璽大參
彭君夔憲副張君祐陳君伯獻都帥戴君儀王君繼

善偕餞虞山廟之南薰亭上既謁廟乃宴乃往觀于
廟後之韶音洞既醉賦詩留別諸君子

山隱韶音洞江橫舜帝祠旌旄勤出餞崑石借題詩客
路春梅色湘洲碧草辭都忘去程暮留賞更傳卮
贈言紛授簡祖席迴臨城奉使憐遐域羣公荷別情灘
波經地險桂樹向冬榮勝會知難再相思一寄聲

全州歲夜

殊俗聊相值空堂誰與同燈明深雪裏歲盡漏聲中野
暗孤城柝庭高古樹風頻年遠爲客此夕意何窮

贈靖江王孫

顧璘

大雅詩書志高情洞壑居風流宜鶴氅雲氣繞鸞輿摛

辭過梁宋召客得應徐投簪吾未老猶可曳長裾
紫閣投朱紱青山臥白雲鳳笙留祕曲鴻寶枕靈文近
得臨邛客飄然思不羣時傳古洞賦爲我洗塵氛

將赴灌陽

累歲倦行役茲晨仍灌川路危纏嶺脊草盛隱人肩逐
客窮愁地荒城大有年不才寬罪譴何以報皇天

入金盆山訪唐孝子

舊聞刳股事今見結廬情篤行關風俗殘軀效死生秋
原雙淚苦春草寸心傾獨夜悲風切偏聞宰樹聲
秋日觀風地青山五馬莊荒廬依大塚烏鳥泣衰楊孝
子人倫重高賢世緒昌磨崖傳故事林壑借餘光

訪仙源洞得道人蔣馨故棲石題

水曲桃花暗靈巖信有仙蟲書留古洞鶴駕去何年白
犬眠金竈蒼龍飲玉泉愧非嵇叔夜來此竟空旋

小泛得黃樓諸山之勝

不奈城中役重尋水上游秋光俱白舫山翠忽黃樓竹
覆溪門淨雲藏石洞幽誅茅饒野意留語報沙鷗

雪霽登湘山露勝亭

勝地意何限新晴還獨過衆山殘雪滿孤嶂烈風多浪
迹留巖壑幽襟到薜蘿俗塵休見染欲此問維摩

春日磐石江上

歷歷春山色留人坐不歸空園花自發芳草雉爭飛多

病懷鄉切端居出郭稀塵冠將白首無乃負漁磯

飲柳山上

白日空山靜青春結駟來江橫羣水合野濶萬峰開柳
子絃歌室章公射飲臺併餘芳草色默默對銜杯

把酒高臺畔青山落案前飛花三月雨垂柳萬株烟勝
地堪吾醉清風愧昔賢塵纓何處濯深澗有寒泉

月牙巖

孟洋

天設巖須古月牙名自今樹低千岸轉洞敞萬峰侵冠
服承雲麗笙歌落澗深南州真勝概北客此登臨

同顧刺史遊柳山

昔慕柳侯迹今逢顧守遊山形盤野壑樹色動江流城

郭登臺暮風烟倚閣秋不須松下酌深坐已忘憂

答黃橫州

漢苑同遊客分飛已十年封書橫嶺北灑淚桂江邊辛
苦仍州郡飄零獨簡編天涯春色暮寂寞萬峰連

懷顧全州

蔡羽

憶別長沙客猶驚帝里塵霜飛兩地月草結百蠻春舊
賦傳鸚鵡新詩得素鱗東歸紅日近直道豈難伸

顧子謫全州遇贈二首

李夢陽

楚城悲遠望君去更悠悠十月逢南鴈章江况北流寒
沙帶宿莽霜月下孤舟明發湘東路應添弔屈愁
蒼梧遺舜迹白雲秋氣愁君得人文地相傳是此州山

連夜郎密瘴入桂林秋獨有思親淚非緣逐客流

送顧華玉謫全州

何景明

白日春城暮孤雲天際陰君行萬里外予憶一何深夏
擬浮湘水秋應到桂林衡陽去不遠莫使鴈書沉

得顧華玉全州書兼知望之消息

地北一為別天南真可哀同時萬里去隔歲一書來水
澗蛟龍出山深杜若開相思有詞賦愁絕並登臺

贈別顧華玉謫全州

孫一元

桂嶺經行處泉聲日夜潺飛蛇晴挂樹毒霧晝沉山去
國鳴孤楫傳詩到百蠻柳侯讀書處遺像沅湘間

宿布村

潘希曾

泥塗日已夕草閣雨猶寒美睡方知倦羈栖自鮮歡泉
聲迴澗底花氣藹林端往路還何許沉沉夜欲闌

南寧太平之間巖石奇絕累日玩之不厭

兩崖迴石壁悅玩竟忘疲混沌何人鑿玲瓏一世奇纍
纍鼎象物隱隱畫藏詩絕頂雲昏處惟應仙鶴知

題陽朔縣

王臣

山城極清秀彷彿武陵源黃葉飛江路青山到郭門田
中禾本立牆角豆花存坐待梧桐月披襟共客論

送夏大行奉哀詔使南紀

王廷陳

我亦天涯客看君萬里行浮湘遷史迹喻蜀馬卿情雲
氣蒼梧野楓林白帝城壯遊茲不忝海內早知名

興安道中

汪必東

問縣古興安觀山秀鬱盤松浮蘿蓋遠石溜澗泉寒陡
閘平分浸湘灘此發端放舟沿兩岸花草入窓看

靈川道中

曉日靈川道春風遠使旌山迎來雨色石過轉泉聲細
澗桃紅杏高原稼綠平人家多隔樹疑在武陵行

過陽朔

路經陽朔縣避瘴日輪高萬石攢如筍羣峰拔不毛問
民多土著移習半酋豪前問田州計臨風思獨勞

過平南

西粵得平南觀風足美談水光明曉練山色遠晴嵐稼

稽田中半絃歌巷什三祗憐戎馬地賦索日難堪

駐潯州

三峽聞藤斷雙流見桂平泮河通象遠勾漏出龍清何
事虛開府頻年少住氓蕭條駐藩節回首愧干城

駐賓州

長驅來宦轍遠徼入賓州地接龍荒貢途通象服郵民
風今不陋王澤故常流何爲田禽驚偏煩士馬蒐

駐荒田

野憩得荒田煩襟一灑然樹封村落僻草構驛亭妍驟
雨收炎瘴微風度晚蟬夜涼清夢足忽忘在遐邊

駐南寧

西粵觀諸郡南寧亦首風正音前漢叶奇貨左江通銅
柱勳名後金城禮信中其如夸壤接常歲事征戎

興安道中遣興

戴欽

不是天涯子誰知行路難高江吞地轉翠嶂倚雲蟠斗
口牽腸曲龍塘照膽寒萬重烟樹外何處望長安

項貢士之任蒼梧

張璧

八桂重蒼梧君才信不誣兩藩都會地百里幅員圖荒
籌亂初定窮閭貧未蘇撫摩宣帝澤聲譽徹天衢

過象州

蔣山卿

秦皇開象郡茲事已千年臺古埋秋草城荒起暮烟江
天雲漠漠石嶺月娟娟萬里慚漂泊因風懷昔賢

送吳司訓擢羅城教諭

陳琛

對花呼酒數留客，索詩頻談笑。真驚座風流，迥出塵車。圓何擇地春好，總宜人聞說。羅城柳年來亦轉新。

送章以道之梧州

錢公琦

君行就遠道，我淚灑東風。易別三春酒，難逢百粵鴻。壯懷依短劔，浪迹任飛蓬。後夜蒼梧月，相思有夢通。

贈別韋評事歸靖江

黃佐

抗疏甘南謫，知君不負丞。離情江上樹，聚首驛前燈。幽谷歌鳴鳥，天池息大鵬。扁舟泛明月，回首夢毘陵。

靈川寄懷

性拙嗟無侶，交深賴有君。襟期珠海月，去住桂山雲。黃

屋匡扶切蒼生，軫念勤靈川。烟雨裏憂樂，夢希文。

興安道中

放浪滄洲客，遲迴桂水春。密雲虛礙馬，芳草遠隨人。野濶啼鶯樹，山多佩犢民。戍歌愁聽汝，荒服幾時新。

游南山

劉節

故事蘭庭舊，遊踪石洞新。神工開混沌，地軸聳磷岫。雲散千山雨，花明萬樹春。探奇仍弔古，都屬詠歸人。

鼓架浮晴

張憲

三峰如鼎峙，一井碧漣時。翠色晴方好，紅妝雨亦奇。不聞傳漏鼓，惟可豁愁眉。僻性耽泉石，往來無定期。

烏蠻灘上曉發

向錦

威武神祠下鐘殘曙色分疎簾透初日危嶺墮秋雲江
滿灘聲穩風高鶴唳聞身為萬里客獨往更誰羣

酬袁永之

書自陽朔寄來

楊慎

書到滇陰日封題陽朔春同心雖異縣未面已通神駿
發高岑後鴻裁擘壽新永之近著皇明獻寶伊予嗟暮耄顛子揆
天宸

太平學舍八首

張岳

吾道江河水文章奎壁精寒光無楚越清潤足餅罌絕
徼兵戈少青衿絃誦鳴新秋占氣候應產紫芝榮
空城抱靜碧太宇逼青蔥誰謂經無用人知聖可同三
千壓戎馬萬丈吐霓虹所志諒能遠殷勤戒篆蟲

陳良稱楚璧姜相擅南金文物動千古風流越在今洞
犀箭礪鏃習羽鶻低林莫遣流光邁負君頭上簪

聲教千年運春秋一畝官明禋薦綠藻遺響拂絲桐地
遠人多朴中孚物自融乘桴非有託茲意鬱冲冲

文豹能藏霧翠毛亦自珍如何寒潭水翻翳後車塵經
緯精微在步趨禮法陳前賢心最苦直指竟非真

迂濶元吾道盱眙是吏師誰能朱墨暇更理鳶魚辭春
雨滿芸閣天聲散鳥夸豈無分竹者感歎良在茲

春秋譏猾夏秦漢事邊功攘斥非無術微言自不同聖
心堙反袂霸氣漫躋竦振策首遐軌多岐幸勿訐

往歲謬文柄掄材上澤宮迂疎成汎愛棄逐任飄蓬舟

楫一身遠關河萬里通重來多舊意朗詠舞雩風
和可齋憑祥途中卽事

昨晚猶孤棹今朝獨木橋千峰旌旆遠萬里鬢容消歸
鳥入雲定殘花過雨飄交南消息近客意自瀟瀟
和可齋飲駐仙亭

亭陰清翠篠樹影搖青楓偶此殊方會翛然滿檻風
碁敲靜夜子月挂下弦弓不爲流連飲天涯任轉蓬

羅叢巖

王清

鑿破金鰲背虛明一竅通洞天塵世外樓閣畫圖中水
冷猿啼月山空鶴唳風閒來足觴詠不必歎途窮

青山廢寺覽古

陳瑾

石壁題名遍雲封古磴斜蜂銜爭嫩蕊鹿臥藉寒花水
碓猶春雪松房半宿霞巖前僧定處占作野人家

龍江舟中感賦

王尚賢

石盡江流緩舟行片月隨村春茅店急野徑竹房敲腰
折緣何事橐垂不自知琴中山水意差可對鍾期

白鶴山

莫魯

峻嶒迎羽翰顧影萃山靈奇骨孤峰瘦霜毫絕頂輕九
臯風欲靜午夜月猶明千載懸歸思栖遲若有情

送田啓東都帥廣西

孫堪

迢迢之象郡望望隔燕雲暫展圖南翼真空冀北羣曾
藏龍虎略劔拂斗牛文萬古留銅柱相期早策勳

赴梧諸寅餞別阻風夜泊

別筵纔十里潮落海珠宮欲挽無高岸相持有逆風蒼
茫孤夜泊想念一樽同新問交州道山川五嶺中

昭州道中二首

潘恩

舟移桂嶺外人泊暮江濱百越炎蒸地千山虎豹羣虛
明涵洞月狼籍散溪雲何處征歌發愁予不可聞
干旌從遠道忠信涉危湍猿挂蒼梧曉鼉鳴白日寒江
山憐獨客簪笏笑微官無奈歸與興裁詩強自寬

過伏波祠二首

伊余來絕徼至此伏波祠石轉灘聲急峰圍日色遲烏
崑雲正繞青草瘴應悲北望天門阻南征羽翼垂

曉月謝雲林槎江深百尋泉飛春作雨瘴遠晝生陰理
棹艱超越乘流歎滯淫懷茲靡監賦復惻武溪吟

三洲崑次韓襄毅

虛無分地竅融結妙天工玉笋懸雲上丹鱗起洞中神
鉦鳴石細靈鼓震波洪緱氏山頭鶴飄飄下碧空

十二月重至潯州復值立春日桃李競開

潯水重來地還逢爛熳春桃花頻送客瘴嶺未歸人興
逐蒼雲盡愁將白髮新故園松菊冷吾愛若爲鄰

象磯

危灘延竹纜銛石瞰虛舟霧氣晴還濕嵐光午未收悲
歌憐獨往指顧憶同儔鎮日如相約雙來水畔鷗

過檢篙灘答金之乘僉憲二首

巨靈蹠高掌激羽瀉危灘誰謂乘流易將無行路難淒涼五嶺道惆悵一枝安况復逢遲暮那堪草色丹

峻峽緣崖盡輕鳧引浪長蛟龍亂雲霧山水動文章目極芳華歇愁經晚桂香煩君慰寂寞琬琰照江鄉

送丘止山之任柳城

高才淹枳棘出宰歎蹉跎鳳嶺雙鳧去龍江一鴈過宦遊致身遠文翰取名多知爾彈琴暇流傳白雪歌

寄寄亭二首

勞勞江海夢寄寄水雲亭菰米浮波白莢房著子青光陰嗟過客蹤迹信飄萍獨坐秋風裏焚香入杳冥

假息風塵外無論日月徂筍穿鄰地竹樹借晚巢烏寓目花三徑憑虛酒一壺浮名那復道何處老潛夫

道林寺次之乘韻

卓錫當山麓招提控水東我來聊偃息塵去悟真空鶴踏珠花燦龍翻貝葉紅蒲團焚柏子香引隔簾風

登思恩籌邊樓

吳赴

高壓郡西城籌邊不浪名江山三面敵雞犬幾家聲敗堞烟中靜危橋竹外明公餘一登眺觸處盡詩情

送人謫全湘

袁袞

百粵文身俗華風近若何沅湘秋鴈少嶺嶠夜猿多訪古過銅柱懷賢弔汨羅南中饒瘴癘去矣慎風波

虞山別藩臬諸寅長三首

桂嶺不可見虞祠聊暫留腸因去國斷淚以別知流柳
絲迷征騎山青隱戍樓異時懷此地應向夢中遊
祖道空相送驪歌不可聞自緣憂病骨非敢負明君官
路清朝兩江帆杳暮雲依依更執手去住惜離羣
疏傅嘗辭綬梅公亦挂冠高風今已遠直道古來難笠
澤萼堪茹柴桑菊可餐人生各有志何用戀微官

自柳至平樂書所見五首

象郡極蕭條賓州頗沃饒趨虛多醜女互市半良猺箬
裹檳榔貴花妝茉莉嬌輜軒叨使者異俗采風謠
邕管真堪賦江南恐不如橘奴金彈密荔子水晶虛海

錯羞方物山蕉入野蔬無論寶玉賤魚米自宜居

藤峽韓丞績崑崙狄帥功左江仍略定八寨未全通舞
劍狼家健彎弧達舍雄盧蘇誰養寇何事枉姚公

鬱白方言似潯梧瘴氣賒蚺蛇睛挂樹射蜮晝含沙屋
覆湘君竹山紅蜀帝花夸堅收未盡博物待張華

昭平灘險惡最險是龍頭藥弩絃齊殼銅刀鞘屢抽紅
巾翻把隘白晝競釣舟倘得山韓將狐羣豈足憂

謁劉賢良祠

高樹臨流水空庭澹夕陽萬言翻下第三黜竟投荒事
業存青史英靈儼白楊古來稱屈者不獨一賢良

謁柳祠

羅池非昔日柳廟亦荒頽秋草重門閉寒花獨樹開
文章真命世今古孰憐才猿鶴如相訴松風晚更哀

賓州逢馬侍御君卿

同作炎荒客嗟君未賜環丹心戀北闕白首老南蠻
歲月杯中酒田園洛下山聖朝無棄物早名賈生還

烏蠻灘

灘說烏蠻險今來異昔聞江流清似鏡山瘴白於雲
銅柱瞻遺烈叢祠表懋勳伏波如可作談笑掃妖氛

蒼梧作

氣候南荒異蒼梧濕更饒山雲晴忽雨江霧夜連朝
病與炎俱劇愁隨瘴不消故鄉那可望桂嶺已迢迢

昭潭見雪

五嶺傳無雪三冬喜見花霰喧窓竹響絮捲朔風斜
臘已辭梅萼春先報柳芽誰憐僵臥者猶自滯天涯

門人休寧程世統校

粵西詩載卷十二

奉直大夫前廣西桂林太平兩府通判汪森編輯

五言律

蒼梧立秋

程文德

偶淹朱鳥地又見蒼梧秋
一葉真能落餘炎苦未收
感時仍萬里橫海自孤舟
坐愛空庭月蕭蕭涼氣浮

送丘郡博令柳城

黃姬水

教甯復宰邑彈琴俗不譁
還將桃李樹散作河陽花
千谿暗蠻雨五嶺明仙霞
去去巴江道啼猿伴客槎

烏蠻灘

田汝成

一葉中流下千山兩岸開
龍鼉吹浪轉燕雀受風迴
奔

峭迎船出啼猿近客哀從來輕險絕此涉寸心摧
蒼梧逢程舜敷

去年南海上今日兩江中共是天邊客無煩問轉蓬山
川雖異域桃李亦春風綽綽行藏在翛然興不窮
奉陪岑蒲谷憲使徐吾溪兵備游雪窓宗室之玄
風圃明日雪窓蒲谷繼有高倡各次原韻二首

許應元

巖亭攀歷晚秋色滿高林竹密睢陽苑畦成漢水陰每
看題石處彌觸住山心未遂辭纓冕他年愧盍簪
名園纔近郭已覺遠塵囂石露下松葉溪雲生藥苗亭
臺延夕眺劔履遲春朝時聽村畔語欣逢布六條

遊湘山寺

木末恣攀緣香臺倚暮天石潭澄定慮山月照棲禪下
界三湘外愁心五嶺前瘴鄉歸未得此地可窮年

陳儀曹見招再遊湘山

竹逕盤空曲松亭上沈寥秋清諸觀寂境淨四天遙大
隱方延幕中林早見招晤言探杳妙鍾暝未旋鑣

送劉鳳麓司訓馬平

馬森

送子長安道炎天帶雨清人遊五嶺外路指九疑行象
壁烟霞壯龍江物色迎青氊非寂寞立雪有諸生

送阮沙城梧州調兵

王問

六月詠棲棲璋書晝夜馳遙徵嶺西卒來靖海東夸赤

豹總皮甲飛熊綉羽旗似聞軍令肅戢戢下江滄

送顧九華之蒼梧二首

乘驛向滇水遷官又鬱林兩鄉俱絕域萬里隔同心簿
領三刀貴風烟百粵深壯圖應未已愧我早投簪
携手出南郭躊躇川日斜輜車初倅郡遷客又辭家一
入蠻中路全開臘底花邇來施教訖文物似中華

鬱林州

舊屬蒼梧郡今通南海軍峒中風轉惡嶺外氣全分怪
蟒呼人姓陰蛟吐瘴雲夸歌起樵牧幾度隔墟聞

贈別徐華原大參之廣西

馮惟訥

君停灞水驂千里向江潭隔歲官程近乘春別路諳浮

踪驚若駛離思鬱難堪索莫岷山外方欣斯道南

次韻留別西粵諸公

侯一元

冗吏謬移秩岐亭違斷金嶺雲隨匹馬湘水載孤琴天
遠跼鳶渡風高迴鴈岑誰憐執圭客猶此越鄉吟

龍隱巖

謝少南

龍洞曾三過清樽今始携花間坐春鳥水外疊晴霓白
石前碑勒青蕪舊隱迷移舟有芳訊霞爛碧桃溪

登七星巖

熱火窺玄谷披雲上翠峰王城環翼鳳江水抱游龍草
合虞皇轍疆分漢帝封還將千古意把酒對高春

遊獨秀山

接地孤峰起栖霞古洞開賢王行樂墅高士讀書臺水
澗龍紋繞松巖鶴駕來更看花發處忽漫憶天台

遊靖藩宗室池亭

帝胄仙人館朱扉綠野堂水涵魚藻動籜放鳳翎長客
簡雕金賦神丹闕玉房悠然心自遠疑是白雲鄉

蒼梧李氏園

自作粵中客常懷世外情相期訪林壑渾欲謝冠纓蕉
密俱垂實花繁不辨名雲軒駕飛麓月出坐吹笙

蒼梧歲暮卽事

鬱水初征地炎州杪歲時囊衣春忽試篋扇夏先持蕉
葉愁中展桃花醉後疑轟雷莫將雨客枕夜常摺

聞沈紫江總戎捷報

鼓鼙頻報捷春淺未畊時峒轉流星騎花迎立表旗風
烟開百粵宵旰念南陲疆理周宣盛中興更勒碑

蒼梧夏泊呈同行楊少室憲長

嶺外自恒炎梧山更鬱盤江霖偏作癘冰井不生寒並
艤枕椰樹初看荔子丹仙舟涼夜興飛雪洒鳴湍

大黃江口

錢薇

江流急於箭風高浪拍天簾開山入坐雲暝雨隨舷椎
髻蠻堪駭侏僂語孰傳回看津吏候瞬息過前川

牂牁江

路入東甌境猶登萬里舟衣冠無故識邪許總夸儔壤

接夜郎境程踰銅柱秋清風賴相送暫爾思悠悠

桂林署中有作

萬里來何事驅馳畏簡書邊城看月上春嶺見花初遠
徼頒王曆停驂校國儲經年勞鞅掌日月且居諸

來賓道中立夏先一日

心折盤江道迢迢山下輪從行徒卉服入望是來賓明
發剛初夏茲辰惜暮春三年滯粵徼不敢畏風塵

書蒼梧署中

兩載天南棹兼旬鉤檢賒明庭隔霄漢使節滯荒遐花
鳥同中土雲烟帶遠沙炎方非足慮祇切愧黃麻

平樂署中晝霧不卻

曙暘宜散翳此地獨陰霾暗毒流春澗平堤若陡崖戈
矛風火接鼓角虎狼儕持節無織補慚予孰可措

送戴中舍改判太平

孫 陞

莫以春明遠卽歌行路難麗江秦代郡別駕漢時官五
嶺雲常暗三冬候不寒傷離無限意惟有勸加餐

送王提學赴廣右

儒臣銜命去春杪惜離居薊北柳堪折天南鴈漸疎驛
途花拂幘星舍翼臨墟百粵誰言陋從今鄒魯如

送丘明府赴柳城二首

君器本懷奇飄零鬢已絲分符今絕徼策馬是行期鴈
叫寒雲急鳥棲古樹遲王維徒永歎何處薦丘爲

夫君遊宦地言在瘴江邊野色多榕樹山聲亂杜鵑無
嗟羈客遠須識古人賢柳子還祠廟松林藹碧烟

送翁一水守梧州

康大和

嶺海天涯路使君江上舟旌旄揮落日霖雨轉清秋列
署名何重專城譽更優堦前原萬里飛夢到神州

蒼梧舟中

王宗沐

忽忽歲云暮孤行尚客舟家將萬里隔身豈五湖遊
奇雜嚴宵柝炎多廢薄裘江聲漾嘉月清影爲誰流

發橫州

何御

役役催行色蒼蒼望曉河雁經廉海少花發越山多水
芋宜春種烟蘿待晚過單車猶入郡五馬意如何

至烏蠻灘

灘水迅如此行人仍暮過風烟蠻道路祠寢漢山河功
豈雲臺掩悲應野老多千秋思蕙苒返棹激長歌

潯江舟中

野橋津吏待稍泊散羈愁江月先臨館山雲早上樓人
喧城下渡鼓發驛前舟暝色蒼蒼遠風帆何處收

送少參袁鍾山之嶺右

汪鏜

班生擁飛傳舊侶羨登仙官重薇垣使名高漢署賢省
方隨化雨問俗洗蠻烟更憶留棠舊瞻依似昔年

簡全州林刺史

呂希周

草色遠淒淒山城落日西肅霜長劔冷深徑暮烟迷桂

老橫牆出松虬亞屋低故人還只尺燈火下前溪

送黎封部參藩廣右二首

張居正

尊酒河梁上穠穠夏木陰片帆千里遠一語百年深去
住悲離合乾坤自古今相思何處切纖月到疎林
於爾開青眼相看器自殊鳳翎雲外出劔氣斗邊孤謝
樹憐雙玉雄文重兩都向來餘古意且得問蒼梧

送范比部恤刑廣右四首

客舍起驪歌雙旌擁玉珂紫貂衝白雪彩鷁渡黃河遠
布虞廷詔深知禹泣多卽看萬里去把袂柰君何
畫省二年績彤墀五色章君恩覃桂嶺使節指蠻方懷
古悲蒼野登臺弔越王更須勤疏草解網答明光

春色盎金莖春風滿玉京市橋朋酒綠關塞客星明慨
慷青萍劔行過白帝城懸知思舊侶愁聽鳥嚶嚶

卽有同心者寧如君與予過談皆意氣投贈自瓊琚五
夜西曹夢三秋北鴈書梅黃應下峽可得問蓬廬

送南海黎參政之廣西

袁尊尼

華省機雲接朱輪嶺嶠行五羊桑梓近八桂瘴烟清控
壓資才略旬宣仰政聲夢中春草句不惜寄江城

橫州夜泊浮槎館

張佳胤

奉使豈張騫仙槎此地傳舟來豚鬻水人及荔芰天客
舍懸新月鄉書已舊年因思一片石今在錦江邊

初到橫江

吳時來

濯足橫江水爲家又此城雨餘山似拭風霽浪初平石
蹟沿江靜沙痕傍月清行藏隨所寓淹滯豈無成

洞虛亭次韻

董傳策

高峰青不斷小洞妙堪過石壁分秋爽禪心失梵魔清
風松外颭塵劫望中磨拈出虛生白靈修並雅歌

咏董泉

徐浦

石隙鳴泉瀉秋深玉髓流精靈涵太始澄澈濬源頭出
澗施千頃餘波沃九州生民望龍雨早晚此中求

聞粵西除命有作時以楚臬迫將入計

王世貞

歛然除目下呼酒一爲懽豈謂投荒易端憐入計難桑

榆元愛暖蒲柳自知寒早晚從休沐將因託挂冠
長沙七千里過此更沉沉汨沒非吾責歸來是夙心蒼
梧眺不盡白髮話來侵縱有東風在幽蘭寒意深

興安道中

方弘靜

雲迷峰自疊灘急水相離湘灘二江于此
分言相離也竹露長疑淚

松風不斷吹鐘兒歌刈稻孺女舞祈祠萬里今封建無
言陋九夸

夏日同劉藩伯蔡憲使王總戎遊郭外諸洞時總
戎以辟瘴方見贈

羣公耽野趣上將擅詞場出郭雲峰近題詩竹徑長洞
中元太古嶺外幸相將一使塵襟洗無煩辟瘴方

落日徐回艇微風更舉杯千騎隔竹待雙櫓拂雲開江
遠霞依草厓懸乳映苔粵中何秀絕寧憚觸炎來

華景洞作

憑几羣峰迥披雲曲磴幽疊屏依積水三伏此清秋不
見雷爲市虛疑蜃結樓久知佳絕地嶺表足淹留

再遊冠巖

縹緲藏雲壑霏微浸玉潭渾淪疑乍剖山澤適相含久
坐龍應起頻遊鶴可驂不知身萬里便欲挂朝簪

府江舟中

灘窄自應激嶂深殊未厭揮絃白鳥起卷幔碧雲添境
昔華夸限官今吏隱兼榜人無太駛爲數衆峰尖

風洞二首

炎方稱麗絕伏日愜追遊野寺烟蘿古山城風雨秋停
杯木葉下移榻鳥聲留顧此頻歡宴深慙時未酬
遂有千巖競曾無萬室喧尊前仍極浦物外豈高軒泛
泛野航得依依原樹存坐中適不飲借問欲何論

送比部陳郎中守南寧

兩江資控遏南去楚亭開馬退茅亭在龍穿鬱水來玉
符臨駱邑銅柱畫交臺漢吏西曹客翩翩斧鉞才

送王十二之馴象

君去蒼梧遠秋乘萬里風水程三楚外山色九疑中桂
子花初白枕椰葉幾叢家鄉東海上知有夢魂通

送鄭太守君亮赴永寧州
春雪犯江花西乘萬里槎天開五嶺濶路出九疑斜蠻
徼通謠俗車書一漢家相思灑水月照影過長沙

逍遙樓

陳迥暹

逍遙求故閣臨眺釋前聞臺跨三湘樹窓飛五嶺雲曉
烟開粵戶春蘚上顏文夏日誰言永追懽悵易曛

留別粵中諸公次侯二谷相送韻

烟波別鴈羣伊軋水中聞地里蒼梧外天文翼軫分暑
收三伏雨山斷九疑雲行到滕王閣臨江長憶君

送林上舍使廣西

游震得

楊柳風仍細離亭花正開歸榮天上使書捧日邊來閩

粵山川共淹留歲月催倘過湘水宅莫爲賈生哀

送二兄謫平樂貳守

林爓

暫會仍分手離魂黯欲銷如何適萬里况乃傍三苗中
土風烟隔征途雪霰飄願將盤錯意持報聖明朝

送三兄之任左州守

芳郊愁送遠烟柳正垂堤別酒燕臺北征途象郡西春
帆湘草綠候館嶺猿啼借問南飛翼何年得並棲

挽吳若峰大參若峰自言廣西之功遺而未錄明
日余方檢牒訃音俄至悽惋久之 楊 博

廿年同畫省相見慰離愁方論桂林事忽成蒿里遊一
官不受薦五嶺合遲留直道今如此油然雙淚流

之子南州彥南州美更多生祠存粵徼歸觀向江沱空
館悲猿鶴長途慘薜蘿元功終未論如負故人何

登橫州鉢嶺二首

翁溥

百粵孤高處披雲試一臨萬山殘照遠列郡瘴烟深古
樹藤蘿合空林猿狖吟殊方聊復爾天地滌煩襟
天畔招尋客奇探興不羣將軍凌紫邏多士入青雲野
曠孤村小江晴遠水分飄然遊象外歌嘯隔霞聞

送王開府之廣西

張士淪

八桂烽烟息清樽遠餞君節移五嶺重旌向百蠻分控
扼思行險忠貞託霽雲聖朝恩紀濶早晚建奇勲

風洞

漆文昌

鑿石聞玄竅磨苔讀斷鐫搖風知洞閒驚雨訝龍還坐
景寂無語因詩悟得禪春糧誰食實嘉種自良田

思恩舊府

周璞

聖朝文化溥土族尚英雄礧礧山川異經營制作同文
亡失舊事世亂剩殘宮欲得興衰故殷勤詢老翁

思恩暗山

傅汝舟

亂山盤一逕衆水伏無門谷助猿聲響烟籠馬色昏息
陰遙問樹具食偶逢村今日來游意祇堪許靖論

水月洞

盧仲佃

空巖開滿月浸濯水中天皓魄千山白虛宮萬古懸七
星光獨朗八桂影爭翩我欲從真窟閒中一弄丸

鬪雞山

嶺西山洞別此有鬪雞名月下昂冠迥風中振羽輕兩
涯虛幻影萬古歛啼聲我抱探奇僻輕舟不問程

遊南山

鄧朝賓

江南開古寺奇蹟到人間石佛懸飛蓋金鱗躍翠巖洞
深雲更鎖松老鶴遊還絕頂攀躋處依稀斗宿參

湘山寺

劉欽順

神護菩提路天遺兜率宮瑤臺紫霧合畫閣翠烟通疎
影松崖月暗香花塢風爲僧心不了何處了真空

遊南山

李義壯

二月試春衣南山歷翠微平林孤石出空谷遠峰稀雲

暖花爭發天空鳥自飛舞雩童冠在猶似詠同歸

送鄭萬松經柳州府

林愛民

仗劍且萬里論交餘十年龍城雲接桂象郡幙生蓮雞
卜隨蠻候狼烽靖瘴烟閒追柳侯興種柳柳江邊

歸自蒼梧偶成

林懋舉

遠出幾彌月蕭然抵省衙心懸兒女戀夢入水雲賒乾
雀晴呼竹春燈夜著花定知鴻鴈信早晚到天涯

贈張月洲司教洛容

遠宦故人少高情兩度過寒原孤月迥曉漏落星多漫
和陽春曲行聽子夜歌亦曾叨獻納能不愧常何

挽沈潯州禹文

朱拱樞

沈約元多病如何事遠遊一麾才欲展萬里瘴先投茂
苑猿空怨蒼梧雲更愁旅魂招未得蕭索不勝秋

送僧遊紫蓋後入西粵

朱謀晉

桂嶺行踪遠東歸定幾年破頭山下寺斷臂雪中禪乞
食依蠻店焚香上客船匡廬僧院在門閉虎溪泉

飲蒼梧高明亭次丘止山韻

余世亨

有美閩中彥相逢越海槎青尊傾澗畔旭日傍山斜淑
氣凝棗棗陽春動管葭共開觀物眼感慨惜韶華

晦日游隱山

張鳴鳳

節晦前朝重春山勝事多巖虛渾駕水石長半凌波日
影驚魚躍泉聲答鳥歌韋吳碑在否不惜更摩挲

九日渚臺

遶臺多種菊應不異陶家几拂松餘翠杯浮桂續花頗
矜貧士樂且幸小兒誇莫問白衣事東鄰更可賒

臘日兒輩置酒含暉閣

延眺屬茲辰江山半露春烟澄初聒鳥雲碧欲親人風
壤開千古文章寄一身落梅吾欲賦兒指北枝新

遊磐石

俞安期

磐空巖壁立屈曲展呆思石類雲千變崖驚乳四垂怒
濤龍出喜怪樹馬驚疑只謂穿巴蜀牽江上峽時

自湘山至獅巖

一壑藏巖古千松引徑長水流無澗戶石覆有僧房秉

燎穿雲紫乘空吐霧黃山山芝蕨滿遊不待春糧

龍君揚赴永安賦此爲別

迢遞邊夸戍悲酸絕海行百憂緣國事一哭豈私情積
氣寒相結江聲夕未平離鴻何意識哀怨向人鳴
功罪寧論實馳驅祇自傷一身酬謗贖九死列戎行海
樹交吹瘴蠻花不受霜長城誰可倚今日爾投荒
粵南元異俗豈意託孤臣語嘯多蛇鬼舟航總蝥人華
音應不解夸習更誰親颯颯形將影遙天對苦辛
伏闕心仍在從君未可期死生謀不定悲喜見應遲變
徵歌殘夜分途淚盡時誰請兒女態寧直有情痴

舒翁邀飲湘山別墅在湘山寺西

別業清湘地仙翁太古人杯如行玉乳坐擬近瑤津老
樹蒼林戶曇雲紺宇鄰月來鐘磬罷蓮漏隔花頻

遊興安乳洞三首

斷磧藏沙渚飛梁渡澗門履田分石畛探水溷雲根凍
雨垂空結春雷殷地奔將無異人隱紫氣擁朝昏
雲扉中自劃雷劒下長聞入戶坪堪宅穿厓道屢分石
牀平覆雪玉柱遠支雲蘚壁紛題墨玄龍錯繡紋
遠叩三重戶如登十二樓燎過翻蟄燕履墮犯潛虬雪
乳浮沙積霞紋抱石流花源津可問隔水見平疇

張質卿太僕邀同張羽王京兆載蒼梧酒過集灘

山旅館

欵門張僕正京兆復能俱嶺外此名士尊前惟野夫玉
羹沉綠笋碧醪出蒼梧屢喚牆頭甕微喧警夜烏

張質卿太僕邀過其兄壽卿府公青蘿園共集

兄弟雙稱美池園獨見邀蟠簷蚪樹老夾逕鶴林遙樓
迴山俱入波涼雨數飄隔溪喧忽動歌吹晚迴橈

同張質卿由南溪歷劉仙巖汎舟至大墟憩壽隆
寺前大樹下

川漲平猶駛仙巖迴更深雲中與烟際水汎復山尋幽
興通玄理微言入短吟繫舟探海藏龍樹覆慈陰

汝成王孫邀同退之遊七星山

有引

山有七峰位置如斗小峰旁出亦若輔星腹多空洞

則有棲霞玄風爲之奇絕

桂尊携帝胄松磴引黃冠空翠深同入山形駭獨看洞
疑霞變幻峰學斗闌干不耐披襟坐玄風吐夏寒

徐醴陵崇德邀同張京兆張紹興張太僕呂京兆
呂中翰遊汎西江歷郭西諸勝返飲水月洞訾家
洲

南國初遊宴西江復溯洄舟移千堞盡戟立萬峰開擊
汰潛蛟逝鳴絃小鳳來長洲淹水月夜榜未呼迴

呂惟師京兆邀同張京兆徐醴陵張隨州張紹興
張太僕呂中翰汎舟桂江憩飲泝波山

桂水流連泛蘿巖宛轉過將舟平次石張坐曲迴波雉

堞垂陰短蛟潭積晦多夜珠方把玩月白起關河

呂惟謨中翰邀同諸君子汎舟陽江湖石梁西上
放舸遵陽水牽江上石梁氣衝微雨白影入衆山蒼雁
急絃移柱龍閒笛臥牀還歌采菱曲月出下迴塘

張質卿太僕邀同諸君子汎舟南谿飲白龍洞歷

山南

水汎情難極山看態轉新鷺形峰作首龍影石成鱗溜
濕更裘急寒吹引酌頻穿雲見花竹烟火似秦人

張紹興壽卿邀同諸君子遊汎江上自訾家洲至

東郭浮梁以雨不果登屏風巖

鷗鷺洲邊水龜鼉郭外梁刺舟行屢泊呼酒罷還觴山

近含雲暝江空入雨長名巖頻起望飛興落蒼蒼

張隨州拱卿徐醴陵崇德各載酒過集琅華館適
退之汝成二宗侯携榼亦至

花間驚屢報竹外起頻迎客履參差至壺醪次第傾厨
烟林徑夕江雨石堂清羈旅寧無事沉埋向酒城

徐象先邀同張汝靜汎舟至木龍渡

障日斜垂幔迎風細覆觴叢蒲新葉短獨樹晚陰長石
齒膠舟澀谿毛引筍香渡頭龍化後禹穴失梅梁

同張汝靜徐象先遊辰山因尋劉升之隱士故居
登山之半三巖層沓石室穹然有五城十二樓之想
一云虎山以石形似名一巖曰蟄龍昔人命嘉稱以

擬劉升之之隱操焉

雲閣三重出烟堂萬石扶數經皆洞府高倚亦仙都叱
虎蹲寧去探龍臥未蘇縱看陵谷變故里識潛夫

過蒼梧張養晦邀同王唯吾丁右武共飲江郵時
唯吾右武謫居相携爲勾漏遊余不期而值喜劇

賦此

蘇濬

廿載星霜換相看憶少年祇由明主愛偏結故人緣拂
劔甘浮白停杯問草玄那堪江上侶風雨隔床眠
莫問山中相且浮海上槎露凝桑落釀龍結武夸芽八
極隨飛駿千秋數落花何須尋葛令相對卽仙家
府江壞舟幾溺幸免漫述二首兼呈葉參知

不覺陽侯怒幾陪屈子遊乾坤猶渺渺身世自悠悠霧
暗鮫人室香生杜若洲風波余已慣何處問漁舟
日月升沉際蛟龍出沒時夢隨雲外去影逐水中移萬
里憑誰報千秋祇自知歌殘堪一嘯不負故人期

送項子忠明府之蒼梧

李敏

白首蒼梧令逢人說瘴鄉藤陰鳴蛤蚧山氣暗桄榔自
昔由虞化何嫌本粵疆桃花栽浦縣春色勝河陽

送張僕卿還桂林

區大相

還朝能幾日去國逼殘年別路春前酒離亭雪後天衡
陽隨去鴈湘浦問歸船未是投閑日東山臥莫堅

送譚司理之越西

得近霜臺使無如郡法曹途趨蠻府遠山遶瘴烟高夸
落無多事鄉音或間操知君心好靜佐理莫辭勞

送黃汝綸柳州尋明府弟

醉發江上棹西遊見白眉看雲吟桂水訪古過羅池霜
葉隨行暮江鴻獨去遲羨君花萼好到處有連枝

送何儀部稚孝謫桂林

長沙非不遠南去更蕭森謫宦楚山盡獨行湘水深鄉
書同鴈少官舍共猿吟今夕懷人夢隨君到桂林

自橫槎汎端溪

竹岸收殘市花源訪故津里將仁共美俗以德爲鄰土
布芭蕉盛林香橘柚新何須會稽守方作錦衣人

送梁同年赴越西幕

灘江西上尋向下動鄉心借問蓮花府人言桂樹林地
形三楚盡山色九疑深幕下由來重多才獨見今

飲柳山

楊芳

把酒高臺上青山落案前飛花三月雨垂柳萬株烟勝
地堪吾醉清風媿昔賢塵纓何處濯深澗有寒泉

送李比部叔良奉使西粵

潘益之

本爲聲華重因之驅汝行正傷遊子路况別故人情賦
自觀濤得槎隨貫月輕莫言知己少何地不逢迎

送張仁伯之鬱林

博士原清秩傳經亦賞心典刑尊絳帳禮樂洽青衿賦

詠三湘竹道遙八桂林石渠方倚重次第主恩深

送何儀部謫廣西

郭正域

如何君遠謫偏在鬱林西
狒狒逢人笑猩猩盡日啼
瘴烟迷癸水怪雨漲南溪
愁問都門信東方又鼓鼙
萬里龍城去迢迢路不迷
風嘶遊子騎月照逐臣雞
荳蔻花應笑檳榔葉已齊
閒行過鈇鉞新句也堪題

知璽召可企能無黯然

李日華

月白梅花晝冰消蒿菜春
酒香薰客夢燈影澹離魂
江曲千羅帶山多萬玉簪
驂鸞如有錄應蚤寄柴門

陳潯州

湯顯祖

何自船同夕偏過酒涉旬
明珠滄海客春色武陵人
草樹他鄉別風烟一處親
清潯好白石吾欲向棲真

送歐陽宜諸守平樂二首

焦炫

相送昭潭去無言鴈亦稀
山川足形勝徒馭有光輝
問俗風猷播行春謠頌歸
懸知合浦葉遙向洛城飛
相逢元不易分手卽前期
豈復辭艱阻行當慰別離
功名邊郡重歲月主恩私
慷慨臨岐意無勞行路知

鬱林過博白道中卽事

金輅

不識辛倉路今知九岐橋
江流南入海山雨北通潮
野興催詩急鄉心入夢遙
蒼梧雲暗處疑是聽簫韶

興業過博白道中

官道穿崎峽籃輿襯晚晴水鳴如有爲山曲更多情野
鳥迎人語林花映日明愧無經濟藥何以慰蒼生

平樂廣運堡謠

管大勳

廣運接龍洲營屯跨上流編茅環作屋剗木卽爲舟城
郭依高塹豺狼遁遠陬年來平十寨無復九層樓

白鶴山

莫魯

峻嶒迎羽翰顧影萃山靈奇骨孤峰瘦霜寒絕頂輕九
臯風欲靜五夜月猶明千載懸歸思棲遲若有情

安南貢使阮實道蒼梧以詩上諸司時觀察胡公

次其韻余復次之

陳熙韶

銅標長偃草玉節早銷氛鎖鑰嚴周甸鏡歌響越雲穹

方都革面殊俗故同文最喜來王者能空冀北羣
星門戎索靖日域塞烟清象齒關南道龍驤嶺外營冠
裳歸漢習笳鼓事郊迎側耳蠻雲裏喧闐起頌聲

木龍洞

曹學佺

桂中稱最險城外有重局匪藉丁夫鑿能穿癸水亭坦
然車馬路宛爾木龍形却喜沿江望堯山一抹青

明月洞

斜陽已半壁危磴直千盤平野看垂盡移時立未安洞
周如繭室峰峭類魚竿更欲邀明月令予宿廣寒

登雉巖相傳卽雉聽經化處唐宋人多於此送遠
亭榭久堙予興復之

江水入陽渠春流曠有餘巖空靈雉化穴小定僧居出
餞聞茲地歌風陟彼祖久無軒蓋到荒徑爲誰除

登榕樹樓

樹以何年植門因異迹留雙根蟠孔道密葉覆層樓
水臨空濶荷香逗早秋却因尊酒寄暇日一消憂

汎舟金蓮港因游白龍洞

的的水蓮金舟移入港深孰知平野上轉自得幽岑穴
暝分僧爨泉高落梵音秋光渾不減僻處乍堪尋

桂林風謠十首

楚粵流皆仰湘灘水自分易生階面草難度嶺頭雲素
節龍舟競冥搜鼠穴熏水東街最盛游女咽羅裙

零陵入始安桂海地漫漫節令無冬夏陰晴變燠寒茗
含烟氣重蔬裹礫沙乾癸水東城入兵戈幸不殘

水繞東城永
不受刀兵

古識
云癸

自古云荒服分藩亦懿親銀章懸國信朱邸錯居民城
外寬文網車中吐錦茵他方傳好尚厭罷此纔新

物候中華隔高寒轉苦卑桂花多晚實松樹每交枝蠹
粉時侵面水風易中肌嶺西饒藥物病嬾亦誰醫

簫鼓沸中秋肩挑水族稠饗食臨頓辦節序競時修月
兔燈俱上風鳶瘴易收官街青石路醉倒滑如油

不住檳榔嚼相傳好辟嵐喉乾如轉磨葉響似餵蠶棄
地皆脂澤逢人若醉酣生年無半百黃面老瞿曇

偏安聞此地漢法已全疎塞迥書違鴈溪清弩射魚穿
山爲孔道放陡下靈渠待學桃源隱村村盡可居

夜坐多蚊母秋成半芋魁寄桑傳釀法文石中碑材成

餉資橋稅山田仰糞灰廣南商販到鹽廠雪盈堆

猺糧難猝辦村老未全馴風俗傳雞卜春秋祀馬人法

依山例峻歌疊浪花新嬾婦田間過忙將織作陳嬾婦山猪

也食人田禾以機杼之物陳設則止

退食衙應放長時印早函銜孟誇瑞露燒笋出靈巖吏

隱吾何媿人言或息讒豈如元祐世黨籍至今劓龍隱巖有

宋時黨人碑

送林穉虛之官梧州

徐 勳

一官新被命千里粵西遊果綠生人面山青露佛頭夸

風驅毒蠱蠻客貢犀牛地有黃茅瘴丹砂莫憚求

城東亭送李別駕守全州

梅鼎祚

斗酒別津亭踟躕五馬停西南開井邑岳牧重朝廷飛

蓋夏雲白褰帷越嶠青佩刀吾解贈風雨散精靈

送雲野考功參政廣西

彭 年

星郎辭握鑑天子重爲霖大政參薇省名藩轄桂林清

風携鶴去鄉路聽猿吟畫繡多榮寵猶懸棗萼心

送徐上林謫橫州

卓明卿

承譴向遐方天南道路長鷓鴣三月雨荔子一秋霜地

僻猺踪雜官卑王命將猿聲無日夜誰謂不思鄉

奉送大中丞陳公督撫廣西

共誇百粵地萬里擁朱輪夾道枕椰茂遐荒犀象馴天
應驅瘴癘山亦鬪嶙峋組練浮光處樓船渡海濱

潯陽送客之廣西

方問孝

江風吹鴈音嘹唳滿江潯九派離盆浦千峰入鬱林清
霜斑樹色斜日落帆陰莫向磯頭泊山空爔夜吟

益良過古田

何良臣

百蠻烟瘴裏道路異中原月冷千丘骨雲封萬壑爔年
來傷遇晚戰罷幸身存欲作消憂坐無能貫一罇

贈陸潤夫任桂林通判

徐貫

京國論交地都亭送別時遐方民待久故邑馬行遲晝

靜蠻烟息春深化日熙循良應不忝萬里慰相知

夜發湘山

范欽

乘月下南亭方舟泝遠汀波涵灘水白燒入楚天青夜
久風逾爽秋高露倍零不須論物役吾意已沉冥

柳山書院

劉啟

柳山名已久刺史暮方來佳勝依然在榛蕪次第開續
編循吏傳重築讀書臺何幸陪遊行清泉飲一杯

萃綠亭

許時謙

吏事邊城少探幽得自吟構亭倚古岸伴客憩濃陰金
印山隆座龍英水遶林溪聲風裏細日夜有鳴琴

觀魚亭

地偏心愈遠臨眺在幽遐石白非關雪林深不礙花殘
題惟落日感事總朝華魚樂安知我秋風自憶家

觀音峭壁

袁必登

頭頭皆是道樂處更爲天歲去松長老春來花自妍臥
雲堪笑傲對月可談禪悟得東林偈虎溪亦宛然

女夫董文若從粵西龍州再過休菴

盛於斯

三載留西粵孤身歷百蠻啼猿愁落日野鬼嘯空山劔
剩流星鐵弓餘明月彎尊前莫悲咽猶幸得生還

遊羅叢巖

馬文祥

暇日尋幽景巖深別有天龍湫清徹底月窟暗中穿白

蝠棲崖邃青羊倒樹懸二程經歷後勝概至今傳

千里欲窮目捫蘿躡峻巔陰巖常積雪虛壑自通天丹
竈閑瑤草蒼崖溜玉泉醉題磨蘚壁詩思入幽玄

蒼梧卽事

楊嗣賢

駐目蒼梧野雲烟半杳冥荒林虞舜廟斜日呂仙亭城
枕三江險山連百粵青長歌舒逸興激烈振林垌

梧州卽事

鄺露

朝登綠珠渡暮宿鬼門關合浦懸明月長藤引白蠻金
蠶驚客夢肉翅飽人還以此聞征鐸栖栖思故山
地闢見聞異去家三月餘金環殉吉鷄花縣稅鯖魚鑿
井氓歸洞燒雲客滿畚坐令南鴈盡不寄一行書

